

Eroho Yowarya

Evaheriwe Exeenii?



Moone, Munna Neville onnaamini wiixaatherya matata.

Kinnoona wira kihaana sookoha kamosa-kamosa. Vano, kinookuxa iya meelo ohiyu, okhala wira nkirina okathi wo wooweheryani ohiy'ula, khino Mutthaka wa nsana ohiyu. Vano, akhala mutthu orina yookoha ya khula Mutthaka, aruuhe paahi ohiyu umosa, nto kinoowerya okuxa ohiyu onttharelana.

² Vano, meelo ohiyu kaatthuna kiphwanye, wala kikhalane, kiireke, arumeyi kamosa-kamosa, vaweryaneya vale; vaahikhale, alopwana wala athiyana, ooreera murima oolipa naakhanly'ahu owiihanaka okathi antthunaney'aya, wira vairaneya. . .

Meelo ohiyu ninoopacerya, numala Mutthaka, wiixaatherya matata, ni, wira yaakheliwe Eroho Yowarya. Vano nto, enookhala e. . . Mookhalana oreeriwa wo okhala va mwatthuna vale, okathi wothene wo wiitthyuuwa, waatthuneyaka okathi wothene owo wo okhwa. Vano nto—nto, vaahikhale, mwatthuna vale orowa owannyinyu, vano, naamutthapela, mwaphiya nipuro vaavo nyuwo. . . Muhinsuwel'anyu tu nipuro n'orowa. . .

Ninthuna naaphwanye arumeyi kamosa-kamosa, mammeru aya, vakhala wira alipa-ooxekurya; mammeru aya, nipuro amakaly'aya, vaavo naakhanly'ahu waaphwanyaka vowaakuveya; ni waahela mmosa etthoko emosa, mmosa mw'ekina, ni mmosa mw'ekina, wira ewerye owiixuttihani, nyuwo munrowa ophavela eparakha ela yuulupale hiyo nihimiy'ahu, opatiiso wa Eroho Yowarya.

³ Nsana ohiyu naalavula, “yaari exeeni Iyo.” *Eroho Yowarya Yaari Exeenii?* Vano khusuwela wira Eyo ti sothene, Muluku onilaihenny'awe. Uh-huh. Mwa Yeeyo noophwanya wira ti yeeyo Ekereja ya Muluku yaarowaaya otthuna. Noophwanya wira Eyo ethooneryo, Mulipa-ookhaliherya, yothene, ni ohakalala, ni murettele, ni ohihimuwa. Ni sothene Muluku aalahenny'awe Ekereja Awe, emphwanyaneya mwa Eroho Yowarya.

⁴ Nto vano, ohiy'ula, ninthuna nilaleerye, ahiiso olavula, wiixuttiha mwaha wa. . . Kihaana ipaphelo soophiyaka tthaaru wala xexe sa moolumo va, ahiiso Soolempwa, sa Yeeyo, mwa seiyo. . . Nsana ohiyu kaahihya Etaphulelo aka Cruden ery'ene va, ni nkaaphwannye. Nto olelo kaahaana waavyavya saana Soolempwa ntoko saawery'aka. Vano, ni meelo. . . Ohiy'ula niniixuttiha: *Etthunelo ya Muluku Akelaka Oveleeliha Eroho*

Yowarya Yaari Exeeni? Eyo ti ya xeeni? Eyo etthu yuulupale, vano xeeni Muluku oveleelihenry'awe Yeeyo?

⁵ Vano, meelo ohiyu nintthuna nilavule: *Eyo mwaha wa Nyuwo? ni Munaakhela Sayi Yeeyo? ni Munsuwela Sayi Okathi Munaakhel'anyu Yeeyo?*

Vano nto, numala waavyavya yeeyo, ni Soolempwa, olakiherya yeeyo ni Soolempwa, nirumeelaka Soolempwa wa itthu sothene, vano ale amphavela Eroho Yowarya animoorwa ohoolo nto. Vano nto kinroromela wira muhakalaliho onoopacerya, okhuma vaavo okela ohoolo, wira okeleleke ohoolo ni Eroho Yowarya.

⁶ Vano, okhala wira meelo ohiyu anci-ene khino anookhala okathi wowaatta musaala mukereja, Kinnuupuwela wira naamuwerya okhalana arumeyi anci-ene n'atthu ale arina musuwelelo wo oweettiherya atthu wira yaakhele Eroho Yowarya, waalipiherya, wira erowe owaani ni mu—muthiyana ni iy'awe, wala—wala mutthu omphavela Eroho Yowarya, okhanle ooxuttihiwa saana etthu yo wira.

Vakhala—ru wira munonvaha tu nummeru nanyu na telefooni wala nipuro onkhal'anyu pastore, ohiy'ula wala meelo ohiyu. Munvahe Munna Neville paahi, vano eyo enoonikhaliherya ohikhalana muthukumano. Nvahe nummeru nanyu na telefooni paahi nipuro naakhanly'ahu woophwanyakani. Vano nto mwiire, “Kinookhala oolikana, ni vakhala wira hiyo...munthuna mukihele empa khata.” Akhala mu—muthiyana meekh'awe, vano ninoomuroiha wa muthiyana, moone, wa muthiyana'ola. Vano nto, yakhala empa onkhala mulopwana n'amwar'awe, vano, ninooowerya omuruma murumeyi.

Nto naamukhala ootteeliwa murima nyuwo mwakhaliherya, okhala wira koosuwela wira, khula mmosa, moocaliwa ni yeela, ela ekhanle yoothuneyaxa. Ni muupuwele, “Ole onimuhokoloxa mutthu ephiro awe yoonanara, onnikhuneela itampi sinci-ene.” Munnona? Nto Mwaakameliwa a Kristu onivoliwa etala ni ntthona. Owo onoono owereya w'oyara, wira aayare aana a Muluku.

⁷ Nto vano, ohiy'ula, nihinatthi osoma Soolempwa, nrowe nuuramihe muru okathi vakhani wira nivekele. Ni nihinatthi ovekela, muuramme-ene muru, mookhalana yoovekela? Nvenxe matata paahi mwiire, “Muluku, miyo kinivenxa matat'aka voottitimiheya. Yookhala entthun'aka. Kinvekela wira Nyuwo mukikhaliherye, O Pwiya.” Muluku amureerihe khula mmosa a nyuwo. Owo onnoonaa matat'anyu. Malaikha aakuxa soovekela sanyu.

⁸ Vano, Tithi a Wirimu, hiyo ninnoorwa vano, niwaattamelakani Nyuwo emaara ekina mwa mavekelo. Yeeyo, voohihoverya mavekelo ahiiriwa eriyari y'ana a Muluku ohiy'ula, nipuro nla naamukhaani, ni wira isipo sihiipiwa, ni

noovenxa mirima sahu mwa otthapa ni ohakalala mwaha wo omuttotopela Muluku.

⁹ Davidi aahimya wira aanikela mmuthukumanoni w'athu ooreera murima ni osuweliha soovekela sawe. Nto ohiy'ula, aakhala matata manci-ene. Alakela, khino, kaamwiira, ipursento miloko mithanu na miraru w'ale akilanthé mpaani mu ohiy'ula aavenxa matata mwaha wa soovekela. Enooniherya, Pwiya, wira khaninwerya orowa ohoolo nihikhanle ni Nyuwo. Nihaana okhalana Nyuwo, nihiku ti nihiku. Nyuwo mwa Ekumi ahu, ohakalala wahu, okumi ahu, ikuru sahu sinnilipiherya, okhala wahu, mwaakiheryo ahu, nikula nahu nowiisaakihano nwanan'ihu.

Ni hiyo paahi khanaarowa owerya owana ekhotto ela ya makhalelo nihikhanle ni Nyuwo. Yaamukhala voohiweryaneya mara hiyo wira, ni nihaana wooromelani Nyuwo voomalela. Maana, noosuwela wira nineetta mulaponi mooriipela ni mw'epiphi. Khula epantte nwanani onoonirukurerya, ahelaka miraakho ni matapha. Iphiro sahu, Pwiya, khasireere matapha a nwanani, wira sinixankiheke.

¹⁰ Nto hiyo, nave, noosuwela, woomalelani w'ephiro nookhalana ekhato ele, yootaphuwa yooripela enihaniwa okhwa nirin'ahu ovira-mo. O Pwiya, t'ani onrowa ovarela matat'ahu nto? Nintthuna noosuweleni Nyuwo vano, Pwiya. Nintthuna nisuwele wira Nyuwo moovarela matat'ahu ni hiyo noovarela ntata Nanyu, wira niwerye okhalana nrromelo owo woolipa wira naphiya-ru okathi ule muulupale wookiserya w'ekumi ahu, n'ukela mukhor'owo onihaniwa okhwa, wira niwerye ohimya n'ale ooreera murima a khalayi, "Miyo kinnimusuwela Owo mwa owerya wo ohihimuwa Wawe, ni koosuwela wira Owo aitthana-ru, miyo kinookhuma mw'alipa-ookhwa."

¹¹ Vano, Muluku Tithi, hiyo ninnivekela wira Nyuwo mureerihe soovekela sahu ni othukumana wahu. Mureerihe Masu Anyu. Kaphiyererya ohimya etthu pitthu eri yoovirikana ni Masu Anyu wala otthuna Wanyu, Nyuwo nlelo muhaana owerya wo otthuka eyano, ntoko siiraly'anyu munlittini mw'akharamu okathi Daniyeli aary'awe memmo. Ni ninnivekela, Pwiya, wira Nyuwo mutthukule maaru ni mirima ohiy'ula, wira, ni mukhalihe mwa seiyo etala ni ntthona. Wira awo ekhale oovoliwa ntthona saana vahinwery'aya orupa wala omumula, hata nipuro, mpakha Mulipa-ookhaliherya orwa.

¹² Ninnaamini wira ninkhala mahiku ookiserya, mmuuttutthini mwa Orwa Wawe. Ni ti yeeyo Mitthaka iya siniruheliwaaya, Pwiya. Ti wira athu ekhale oopasoopa, ni oolopoliwa. Nto wira, ohiy'ula, nirule nikosi, naanaano va, nipwehe epantte emosa y'ekhukulu, niire, "Pwiya Muluku, ka nipuro n'ohela etthu wa Nyuwo. Muhiye Eroho Anyu ekhwalale

mwa miyo. Mukuupe ni mukipake ntoko otthuna Wanyu. Kinoovalhererya murim'aka, ikuru saka, sothene saka, mwaha wa niwoko Nanyu."

¹³ Muniwe, Pwiya. Khanikhanle va wira noonuwe, ohiy'ula w'epula. Khanikhanle va mwaha w'ohikhala nipuro nikina n'orowa-wo. Hiyo niri va mwaha wa etthunelo emosa, yoottittimiheya, yooreerhiwa, yoowaarya mmurimani mwahu, ekhanle, okhala vakhiviruxa wa Nyuwo, nisuwelaka wira Nyuwo moohimya wira hiyo nawaattamelani-ru Nyuwo, Nyuwo munooonaattamela. Nto mwaha wa yeeyo hiyo nry'ahu va. Ole onrwa avoliwe-ene etala khonrowa okhuma n'itala. "Ooreeriwa t'ale anvoliwa etala ni nthona mwaha w'exariya," ohimmye ti Yesu, "maana anoorowa ovona." Ni hiyo naveka yolya, khaninrowa waakhela nluku. Hiyo nookhalana ororomela iwo. Ni hiyo navekela ehopa, khaninrowa waakhela enowa. Masi, Muluku Tith'ihu onoonilyiha Emana ya Wirimu, Masu Awe ni Eroho Awe enimukhalela onamoono Yoowo. Mwaakhule mavekelo ahu, Pwiya, ni soovekela sahu, okathi ninkelel'ahu ohoolo noolipelekani Nyuwo. Mwa Nsina na Yesu Kristu ninnivekela. Amen.

¹⁴ Vano, nyuwo munlepa Soolempwa iya, vakhala wira munookhunla-tho ni miyo mwa Yohani Oowaarya, kapiitulu 14. Ninthuna nipacerye kapiitulu 14 ya Yohani Oowaarya. Nto nrowe nipacerye versiikulu 14, Yohani Oowaarya 14:14, nisome paahi nipuro nimosa na Yoolempwa ela. Vano, mwa yeela munooophwanya yoohimya yinci-ene kintthun'aka olavula ohiy'ula.

¹⁵ Ni muupuwele, nyuwo murina aBibilia a ileetera sooxeerya, eri mwa yooxeerya, t'ery'aya. Ala Moolumo Yesu Mwaneene olavunly'awe, vano tivo nikhaleke oolipa wira enrowa voolikane-ene ntoko Owo ohimmy'awe. "Erimu n'ilapo ya vathi sinoovira, masi Masu Awe khankhalakhala evonyaka."

Vano ninrowa osoma opacerya versiikulu 14 ya kapiitulu 14.

Mwaavekelaka etthu p'itthu mwa nsina naka, miyo kinoowiirelani.

Natiri xeeni a eparakha!

Mwaakiphentaka miyo, munimweettela sooruma saka.

Vano miyo kinimwaavekela Atithi, yoovaheni Mulipaookhaliherya mukina, wira akhaleke ni nyuwo mahiku othene;

Eroho yekeekhai; yeeyo olumwenku ohinwerjaya waakhela, okhala wira khonoona, . . .

Vano, nyuwo mwaarowa okhala mmusomaka Bibilia a Ekereku, mwaamoono mu, kahi...Woono mmo enihimya

“osuwela.” “Olumwenku khommusuwela Owo.” Eyo ekeekhai. Mukihiye kisome-tho vano.

Eroho yekeekahi; yeeyo...ekeekhai; yeeyo olumwenku ohinweryaya waakhela, okhala wira khonoona, nnakhala khonsuwela: masi nyuwo munnisuwela; (Aani? Mulipa-ookhaliherya.) okhala wira enkhala ni nyuwo vano (okathi yoowo),...eyo enkhala ni nyuwo, ni enrowa okhalaka mwa nyuwo.

Exeeni Iyo? Mulipa-ookhaliherya yoowo.

Miyo nkinoohiyani ikwaasuni: miyo...

Khula mutthu onnisuwela wira “Miyo” nsina na mutthu.

...Miyo kinimoorwa mwa nyuwo.

Woohala okathi vakhani, olumwenu khunrowa okoona; masi nyuwo muno...masi nyuwo munookoona: okhala wira miyo ka mukumi, nyuwo munookhala akumi tho.

Nihiku nenlo munoosuwela wira miyo kiri mw'Atithi, ni nyuwo mwa miyo, nave miyo mwa nyuwo.

Vo enrowa okhala eriyari ya muupuwelo aka, masi ninrowa otthikela nisomaka vakhani tho. Mukihiye kisome-tho yeeyo, vano.

Nihiku nenlo (nihiku nuulupale, nihiku n'olamuliwa), nihiku nenlo munoosuwela wira miyo kiri mw'Atithi, ni nyuwo mwa miyo, nave miyo mwa nyuwo.

Ole onaakhela ikano saka, nave oneettela, yoowo t'onikiphenta: vano ole onikiphenta onoophentiwa n'Atithi aka, ni miyo kinomphenta, ni kinimwiusuweliha wa yoowo.

Yuta aahimwiirela, omuhiya Isikariyoti, Pwiya, exeeni entthunanyu wiusuweliha wa hiyo, ohikhanle molumwenkuni?

Owo ti, kosmos, “mweettelo wa molumwenkuni.” Mwakhalana malepelo a mukerekhere vo, munooweha. Awaka ti “g,” ni enihimya va, “kosmos, wala enamuna ya molumwenkuni.” Iyo ikereja, ni sikina, moone.

...xeeni entthunanyu wiusuweliha wa hiyo, ehikhanle w'awo? Munwerya sayi Nyuwo wira yeeyo?

Yesu ahimwaakhula wira, akhala mutthu onikiphenta, onimweettela masu aka: (amen) ni Atithi aka anomphenta yoowo, nave hiyo nnimoorwa mwa yoowo, wira nikhaleke mwa yoowo.

Ole ohinikiphenta khaneettela masu aka:...

Alakela munneettela masu a ekereja; masi weettela masu Awe, moone.

. . . nto masu muniw'anyu kahiyo awaka, masi Atithi akirumme.

Itthu iya kinoohimeeryani, nlelo kikhalaka ni nyuwo.

Masi Mulipa-ookhaliherya, ekhanle Eroho Yowarya, yeeyo Atithi anrowaaya woovelelihani mwa nsina naka, eyo enoowiixuttihani itthu sothene, ni enowuupuxeryani itthu iya (eyo ti wi, Masu Awe) sothene, sohimenry'akani.

Etthunelo xeeni Muluku ovelelihenry'awe Eroho Yowarya nto? Owo ancererye iparakhha Sawe mwa Masu Awe.

¹⁶ Yesu oohimya, wira, “Nihiku nenlo munoosuwela wira Miyo kiri mw'Atithi, ni Atithi ari mwa Miyo; ni nyuwo muri. . . Miyo kiri mwa nyuwo, nave nyuwo mwa Miyo.” Vano, naarowaka ohimya ela. . .

¹⁷ Vano, muupuwele, ela enrowa okhala mufiitani.

Mulipa a nakoso muKristu, a Louisville, aahikiitthana voohikhala khalayi. Nto owo khwira, “Wuuliha muru, Billy, wira Mitthaka iya, ntoko sihimaly'anyu nsana ohiyu, ohiphiyaka atthu ikonto miloko mixexe va ohiya emiya emosa ni miloko mithanu, wala imiya piili, imiya tthaaru mutapernakulu mwanu yaamukhaani.”

¹⁸ Miyo khwira, “Mwenye, muhina mwa miyeeri mithanu na mosa okhuma vano, Yesu apisa vale, olumwenku wothene onimwiiwa ola.” Munnona?

Ifiita iye sinrowa mulaponi mothene, moone, mothene. Nto, tivo, hiyo niniixuttih'ahu va vano paahi ele enaamini ahu wira Ekeekhaii, ni ephwanyahu wira Muluku onilipiherya wira Ekeekhaii.

¹⁹ Vano, etthunelo, xeeni yaari—xeeni yaari etthunelo ya Muluku akelaka oveleliha Eroho Yowarya? Vano, miyo kaamulepa eyo, Yohani 14, opacerya versiikulu 14, ni osoma ekapiitulu yothene, ntoko mulipiheryo. Etthunelo ya Muluku, hiyo ninniphwanya va, akeleka oveleliha Eroho Yowarya, yaari etthunelo emosa, wira Muluku Mwaneene akhaleke muKereja mw'Awe ni akeleliheke ohoolo etthokiheryo Awe mwa Ekereja.

Wira, Muluku aari mwa Kristu, akelihaka ohoolo itthokiheryo Sawe mwa Kristu; akhumaka mwa Kristu, khukela muKereja, akelelihaka ohoolo muteko Awe mwa Ekereja.

²⁰ Vano, hiyo noosuwela ele ekhanle Eroho Yowarya. Noophwanya, nsana ohiyu, wira Eyo Mulukuu.

Vano, naamuupuwelaka Muluku, Tithi, ntoko Yesu sihimaly'awe va, Atithi Awe; Muluku, Mwaana, ntoko Yesu; Muluku, Eroho Yowarya, ntoko naarow'ahu wiihana olelo, vano, eyo khenihimya wira ari aMuluku araru oomeekha, oovirikana. Enihimya wira ori Muluku mmosa mwa miteko miraru.

Nrowe nihimye sa. Sothene aari Muluku, Owo aayeehenrye mwa Kristu, okhala wira Owo aahiisiittha Mwaneene khuyeeherya mwa Kristu. “Nto Kristu aari Omuluku wothene woomalela mw’erutthuni.” Sothene aari Yehova, Owo aayehenrye mwa Kristu.

Ni sothene aari Kristu, Owo oyeehenrye muKereja; kahi mwa mutthu mmosa, masi mw’Erutthuni yothene. Vo, ti vaavo vankhal’ahu vamosa mo wiiraanani, ninkhalan’ahu Owerya. Sothene aari Muluku, saari mwa Kristu; ni sothene aari Kristu, eri mwa nyuwo.

“Maana Muluku aahiipaka erutthu, khukhala ni hiyo.” Timoteyo Oopacerya 3:16, vakhala wira munoolepa, “Vekeekhai esiiri ya ntittimiho ti yuulupale: wira Muluku ohiisooniherya ntoko mutthu, ni hiyo noomukwannya. Muluku, Yehova, owiipaka erutthu, oheetta elapo ya vathi, vano hiyo noomoono Owo ni maitho ahu.”

²¹ Moosuwela, ekapiitulu emosaru, ya Yohani 14, Filipe iirale, “Pwiya, nooniheryeni Atithi, vaavo vanoonipherya.”

²² Yesu khwira, “Kookhala mahiku manci-ene ni nyuwo, Filipe, ninlelo khamunkisuwela? Mwaakoonaka Miyo, moowoona Atithi. Vano nyuwo munikihimeerya sayi Miyo wira, ‘Nooniheryeni Atithi?’” Muluku aipanke erutthu.

²³ Vano ela va. Atithi yaari Muluku vasulu vanyu, ninoohimya. Ninnikhalaka okhuma Atamu. Muluku, Atithi, yaari vasulu va Moise ni aana a Isarayeli, mwa Nlumi na Mooro. Vano, Muluku ni hiyo, mwa Kristu; eettale ni hiyo, aalavula ni hiyo, aalya ni hiyo, aarupa ni hiyo. Muluku vasulu vahu; Muluku ni hiyo; nto vano Muluku mwa hiyo. Sothene aari Muluku, saaruule mwa Kristu; sothene aari Kristu, siruule muKereja.

Exeeni iyo? Muluku avaraka muteko mwa nyuwo. Khula nipuro mulaponi Owo atthuna vale owiihanani, nyuwo muri vaavo, avaraka muteko mwa nyuwo wira iireke otthuna Wawe wooreera. Moota vaatthuney’aya omuxukhuru Muluku mwaha wa yeeyo! Muluku, Eroho Yowarya, eveleeliheriwe wira Muluku akhaleke muKereja mw’Awe, eettaka aviraka khula okathi, avaraka otthuna Wawe w’eMuluku.

²⁴ Mutthu ooveehakani, awo khanooveehani nyuwo, aninveeha Ole oorummeni. Tivo Yesu ohimaly’awe, “Ooreeriwa ti nyuwo mwaalavuleliwaka itthu sothene sootakhala, mootheriwaka, mwaha wa Nsina Naka. Ooreeriwa ti nyuwo.” Ni, tho, “Othene ale ankhala vooreera murima mwa Kristu Yesu anoophwanya olupatthiwa.”

Maana, okathi Muluku iisuwelinh’awe Mmansawe mwa Kristu, awo yaanimunyokha. T’ani yaamunyokha Yoowo, vootepaxa? Ekereja. Ekereja ti yaamunyokha Owo, vootepaxa. Awo yaanimunyokha Owo vootepa onvikana na—namuhapaliwa. Awo yaanimunyokha Owo vootepa waavikana

atthu othene akina. Yaari ekereja yaamunyokha Owo. Vano, tivo, moonaka *kosmos*, “ekhalelo y’olumwenku, olumwenku khiwaamusuwenle Owo,” enihimya, “ekereja,” yeeyo eniihaniwa, “khiyaamusuwenle Owo. Owo aarweenle Awawe, nto Awawe khuhimwaakhela.”

“Masi othene ale amwaakhenle, Owo ohaavaha owerya w’okhala aana a Muluku, yaawo yaaminni Nsina Nawe.” Oh, moota nirin’ahu omphenta Yoowo ni omukokhorela Yoowo! Etthunelo ya Muluku, atthunaka okhala m’opatthanani!

²⁵ Ntoko, nihinatthi ohiya yoosoma eyo, rowe nirumeele ela; mahiku a Ruthi, mwa ekano yo ovuluxiwa, okathi Nowemi aakhumaly’awe muttethe, mwaha wo wehereriwa, okathi woorika. Owo aahirowa elapo ya Mowabi, yaawo yaari ookuttihiwa paahi, aKristu nsina. Okhala wira, aMowabi anikhuma mwa mwaana muthiyana a Lothi, nto awo yiihaniwa alipa-oowaamini, ni ootakanxeya. Vano nto iy’awe khukhwa, ni an’awe axilopwana anli khukhwa. Vano arowaka owaani, Nowemi... Ruthi ni Nowemi, arowaka owaani, awawe... Mmosa w’aximaathi awe, Orpa, owo iirale wira aamutthikela owannyawe, w’amuluku awe, ni ekerej’awe, ni w’atthu awe. Nto Nowemi khuphavela omwiirela Ruthi wira atthike, masi owo khwira, “Atthu anyu anoekhala atthu aka. Muluku anyu onookhala Muluku aka. Vanrowaanyu okhwa, kinookhwela weiwo; onrowaanyu ovithiwa, kinoovithiwa weiwo. Vano nkinthika.”

²⁶ Owo okathi mutthu oniir’awe ophwannye-ene yoowoona. Khivaavirikanne hata vakhani wa etthu atthu awe yaahimy’aya, “Munrowa iwo mwakhale santu-oophirikeya wala etthu.” Eyo khiyaavirikana etthu wa Ruthi. Yaahikhala etthunelo ya Muluku wira emaliheriwe.

²⁷ Ni siiso nyuwo mury’anyu oovoliwa etala ohiy’ula mwaha wa Eroho Yowarya, eyo etthu mwa nyuwo, enooruhani, wira etthunelo ya Muluku mwa makhalelo anyu ehaana omaliheriwa, siiso ntoko saary’aya ni Ruthi.

²⁸ Wahala ene t’oreera! Nkinwerya omuhiya, okathi vakhani. Nyuwo moosuwela ekano ya ovuluxa, wira okathi Bowazi... Nyuwo munnimusuwela wahala a moota Ruthi aattottaly’awe maputa mmatta vano khuphwanya ocaliwa ni Bowazi. Nto owo ohinatthi omuthela, aahaana ovuluxa sothene saamupweteiye Nowemi. Nto mutthu mmosa paahi aawerya ovuluxa mukhalelo woomora wa Nowemi, mwa ikano sa ovuluxa, aari mmusi a vakhiviru; yaahaana okhala amusi ahinatthi owerya ovuluxa. Nto owo aari mmusi awe a vakhiviruxa. Ni aahaana opaka ethoonyeryo v’atthuni, ota wa mukhora, wala ohimya v’atthuni wira aahivuluxa sothene saamupweteiye Nowemi. Nto Bowazi aahiira arulaka exapattho awe ohoolo w’ahumu, khwira,

“Akhala mutthu va orina etthu p’itthu ekhanle ya Nowemi, miyo koovuluxa olelo.”

²⁹ Nto ti siiso Muluku iiraly’awe, aattharihenle ikano Sawe yoowo Mwaneene. Muluku khokhanle otthara, woovahani ekano wira mutthare vano Owo khunatthara ekina. Owo onttharihela ikano Sawe yoowo Mwaneene. Vano, Muluku, wira avuluxe ekereja yaapweiteiye, olumwenku waapweiteiye, soopattuxiwa saapweiteiye; Muluku, Yoowo okhanle oohimala mwa Eroho, wira avuluxe muxovo w’atthu woopweteiya, Muluku Mwaneene iikhalinhe mmusi, Mutthu, Mwaana Owo aamupatthuxaly’awe mmirimani mwa Maria. Vano nto Owo aahipaka ethoonyeryo, ahiiso onamoona; ota wa mikhora s’oYerusalemu, Owo aahinnuwihwa eriyari ya erimu ni vathi, nto khukhwa, khuvuluxa itthu sothene. Vano avuuvaka ephome, Owo ooreeriha Ekereja wira Yoowo Mwaneene akhale memmo, ni apatthane ni iiraane ni yeeyo, ekapatti iyo ya opatthana yaapweiteiye okhuma omatta w’Edeni weiwo Muluku aakhuruw’awe khula makaaripi, okathi w’orowa okereja.

Nyuwo mooweha? Muluku aanikhuruwa okathi wooriirya wa nihiku, otupweela wa nsuwa. Yookhala etthu mwa yeeyo okathi onipacery’aya wiila, atthu annuupuwela ekereja ni Muluku; aKristu. Munimoona nsuwa nitupweelaka, munoosuwela wira nsuwa nanyu ninootupweela.

³⁰ Vano wooriiryani wa makaaripi Owo aanikhuruwa ni opatthana n’awo. Vano weiwo Owo khumpweteiya opatthana iwo, okhala wira etampi khayaamuhiya Owo okhalana.

Vano nto Owo khwiipaka erutthu khukhala ni hiyo, wira ahokolowele-tho wa mutthu, ni akhale mwa mutthu, ni omuhokoloxerya mutthu mukhalelo wo opatthana-tho ni Yoowo, ni omuhokoloxerya ehakhi awe yoovahiwa ni Muluku. Ti yeeyo Owo iiraly’awe.

³¹ Eyo t’itthunelo ya Eroho Yowarya. Awo t’Atithi, emaara ekina, Muluku Tithi akhalaka mwa nyuwo, amaliheryaka itthokiheryo Sawe wira amaliherye muteko awe wo ovuluxa; avaraka muteko mwa nyuwo, ookhalihakani mukhaliheri ni Yoowo; oovahakani opuro, oovahakani mpante mmosa mwaha wa munn’inyu, mulopwana ni muthiyana arimenle; oovahakani Eroho Awe ni ophenta Wawe, wira mmurowele ole orimenle, ntoko Owo siiraly’awe omatta w’Edeni. “Atamu, Atamu, muri vayi?” Ti yeeyo Eroho Yowarya enimwiirih’aya mulopwana wala muthiyana. Okathi Eyo enikwany’aya murim’aya khukhaliha etthoko Aya, vo vankhala ntthona ni etala mwaha wa atthu arimenle.

Owo t’uri mulattu ni mithukumano olelo. Khuuvo okwannya woophiyerya wa Eroho memmo, wira orowe waaphavele ale arimenle ni anookhwa. Eri wira ekhalihaxe nsina, wala ekereja, wala empa, wala muromolelo, ohiya eththokiheryo yo waaruuha

atthu. Wooniha othunku! Naamuwerya okhala mwa yeeyo vanci-ene.

Muluku aahiiyeeherya Mmansawe mwa Kristu. Khweli.

³² Kristu ohiiyeeherya Mmansawe muKereja. Tivo, vano nwehe, “Nihiku nenlo munoosuwela wira Miyo kiri mw’Atithi, nto nyuwo muri mwa Miyo, nave Miyo kiri mwa nyuwo. Nihiku nenlo munoosuwela.” Maana, eyo, etthu yothene etthokiheryo ya ovuluxa onikhuruwa, Muluku ahokolowaka wira akhale mwa, ni okhala ni, ni opatthana n’atthu Awe, ntoko siirak’awe wopaceryani.

Vano, nto, Owo amalakaru okhaliha Ekereja Awe mwa mukhalelo wo olavula, okhaliha Ekereja Awe nipuro Owo okhanly’awe okhwalalaka Mmansawe mwa yeeyo, ni ophenta, ni weemereriha, ni opatthana, vano enimoorwa Edeni. Owo onookuxa Ekereja Awe ahokoloxerye nipuro Eyo—Eyo emuhiyaly’aya Owo, otthikela-tho wEdeni, weiwo Eyo emonry’aya. Eyo, vano...Ti vaavo Eyo epacenry’aya-vo emaara yoopacerya, ahiiso omora. Ti vaavo Eyo enrowaaya ohokoloxeriwa-vo, ni khula nipawe nooreera na ovuluxa, naaruuhaka-tho olukama nipuro nenlo.

³³ Ekereja enikhala molumwenkuni mwa okathi khata. Ni Ekereja, vekeekhai, numala Orehererya, wa iyaakha ekonto emosa ni imiya thanu sa okathi w’epiphi...Lutero aari namarehererya oopacerya aakhumelenle numala nikhuru nle n’arummwa. Vano nto okathi Lutero okhumelenly’awe, Muluku aahimiina Eroho vakhani khuyeeherya Ekereja, mwa okhalihiwa naxariya. Vano nto mahiku a Wesley, Owo aahiiyeehi-tho vakhani ya Yoowo, mwa oreerihwa. Nto okathi orowaka ohoolo, mpakha okathi wa woomalelani, Muluku onkhala asarihaka Ekereja Awe. Nwehawehe paahi mapuro othene moone eyo yaakhanle-ene Ekeekhai, wala nnari.

³⁴ Nkawehani okathi wa Lutero, nyuwo munimusoma wahala, nkawehani muhakalaliho aya ni etthu yiiraly’aya. Nkawehani moota muhakalaliho wa Wesley waary’aya muulupalexa, moota yaarinas’aya owerya wowaatta, masi ary’ene vakhani. Nwehe mahiku a Pentekosite, muhakalaliho xeeni awo yaarinas’aya okathi uwo, ovela xeeni, wuulupale ni wootaphuwa.

³⁵ Nave-tho, *Mulletto Ahu a Ttiminku*, epaphelo ya ihapari eKatolika, yaahihimya wira aPentekosite yaahaakhaliha atthu oorukunxa murima emilyawu emosa ni atthu ikonto imiya thanu muhina wa eyaakha emosa, yaahivikana ikereja sothene sikina vamosa. Katolika yaarukunxale paahi, emilyawu emosa, ohimya waya. Mwa *Mulletto a Ttiminku*, yawaya epaphelo ya ihapari eniihaniwa *Mulletto a Ttiminku*, yaahihimya wira aPentekosite yaahaavikana.

Nto, muupuwele, orukunxa murima w’ePentekosite onkhala orukunxa murima woosareya Eroho Yowarya. Yaari

vakhani, epaceryaka, epantte emosa y'ephiro yaamukhaani iwe, ni pa—pankwe a khalayi. Ni athiyana yahaawerya hata othuma ephaara emosa ya imeeya. Yaarupaathi waattamela muxipooroni, yaamuttotta nakhuwo n'umuxila, n'upaka mikatthe s'an'aya. Masi yaaphiyenrye yayi? Ekereja emosa yoowerexa molumwenkuni olelo, kahi vamaithoni v'olumwenku, masi vamaithoni va Muluku, okhala wira Owo onlipiherya ni etthu Owo oniir'awe mwaha w'awo. Owo onimwiiyeehi Mmansawe mwa yaawo, oyeeherya Yeeyo mmo.

³⁶ Nwehe vano etthu yiiraneeye, Muluku aiyeehiki Mmansawe mw'awo. Vano Ekereja yoophiya vatthu, okhuma Lutero, Wesley, ni muhakalaliho ori ni Pentekosite; nto vano okathi ula hiyo nimphiyaahu vano, ni Eroho Yowarya emosaru yeeyo, yo waatta vakhani ya Yeeyo. Vano, okathi aLuterano ale ottuli wu yooponw'aya, awo yaarina epantte ya Eroho Yowarya. Okathi aMetotista areerhiwaaya, owo waari muteko wa Eroho Yowarya. Moone, eyo yaari epantte ya Eroho Yowarya. "Awo khankhala ooreerhiwa voomalela hiyo nihikhanle," sinihimya Soolempwa. Munnona?

³⁷ Vano, Muluku, okhala wira Waarya woopacerya waarya mahiku ookiserya, Owo onwehererya wa hiyo, etthu yuulupale wa hiyo. Okhala wira, "Vale vanvaheriwa sinci-ene, ti vanvekeliwa sinci-ene." Tivo Owo onoorowa onivekela sinci-ene hiyo ovikana Owo siwiireny'awe aLuterano wala aMetotista, okhala wira hiyo nineetta moWaaryani wuulupalexa, ni Owerya wuulupalexa, ni wuulupalexa...o—onamoona wuulupalexa ovikana awo saarin'aya. Vano, hiyo nirina onamoona wuulupalexa wa ohihimuwa. Hiyo nihaana ithu soolipexa, ni ekeekhaixa ovikana awo saarin'aya.

³⁸ Masi eri ntoko sihimaly'aka okoleexiyu Luteraano, woohikhala khalayi.

Awo yiirale, "Nirina exeeni hiyo?"

Miyo khwira, "Mulopwana mmosa aamwaanle nakhuwo mmatta. Khukhuma makukhu oopacerya, nto owo khwira, 'Kihaaxukhuru Apwiya mwaha wa o—omuhepha nakhuwo!' Vooweryaneya, owo aahikhalana, masi owo aarina enamuna yoopacerya paahi. Vakhani vakhani, khuphiyerya okhala mutathi."

Vano khukhuma ekayaya, yaawo yaari aMetotista.

³⁹ Mwaweha vale ephattu, munoomoona Muluku ovara muteko. Yookhala esiiri eri mme yeeyo enrowa ni muteko aka. Munnona? Eyo, oweha ephattu, woona etthu oniir'aya, okathi xeeni ni ewoora xeeni, munoowerya woona vankhal'anyu. Nwehe okathi ene.

⁴⁰ Vano, nto, aMetotista, awo yaari ikayaya. Awo yaarooweha ottuli w'aLuterano, khwira, "Hiyo nookhalana oreerhiwa; nyuwo khamurina etthu mwa Yoowo."

Vakhani vakhani, okhuma ekhitta yeele, okhuma w'aMetotista, khurwa enuku ya . . . mupuso wa nakhuwo. Owo aari Pentekosite.

Eyo vo, okhalihwa naxariya, eyeettelo emosa ya Yeeyo. Oreerihwa, eyeettelo ekina ya Yeeyo. Eroho Yowarya, eyeettelo ekina ya Yeeyo; Pentekosite. Lutero, Wesley, Pentekosite.

⁴¹ Vano Pentekosite oniira exeeni? Miyo kimulikanyihale, okhala wira, mwa Pentekosite, oroohokoloxa, kahi nikukhu nikithi, kahi ekayaya, masi . . .

Enuku khenwerya ohimeerya ekayaya, “Miyo nkinootekelani etthu.” Wala, ekayaya khenwerya ohimeerya ni—nikukhu, “Miyo nkinootekelani etthu,” okhala wira ekumi emosaru yaari munikukhuni t'ekumihenrye ekayaya. Ekumi emosaru yaari mukayayani t'ekumihenrye enuku.

Ni yaari ekereja Luterana ekumihenrye ekereja ya Wesley. Yaari ekereja ya Wesley emukumihenrye Pentekosite.

Masi, Pentekosite, exeeni iyo? Ohokoloxiwa wa muthinto mmosaru w'enuku yaamorenle muthayani wopaceryani, eruuhaka-tho Owerya wothene woomalela wa Pentekosite, mwa opatiiso wa Eroho Yowarya, moone, mahiku ookiserya. Oh, eyo etthu yuulupale, oweha, waamini ni oweha.

⁴² Vano okathi ula ninkhal'ahu vano, okathi ula, woomuvikana Pentekosite.

Pentekosite ohiikhaliha mmitthenkesoni, khupacerya otakiha sothene sa mitthenkeso, “Hiyo na *ela* ni hiyo na *ele*.” Eyo ephattu ene paahi. Khamukhanle ohuluwaka. Eyo ephattu. Awo animwiira eyo. Eyo ti yoothokihwiwa, wira yiire yeeyo.

Masi Ekereja yookelela ohoolo. Eyo yookela mwa itthu suulupalexa, soowerexa. Iwo t'uhokoloxiwa wa soovaha.

Nto athu anci-ene aPentekosite khanaamini ovoniha wa Muluku, muteko wa Malaikha, ni owerya wa Muluku. aPentekosite anci-ene aniihana sowoona iya kinoon'aka, “xetwani.” Mitthenkeso sinci-ene hata khasinthuna okhala nnaata ni Yeeyo, mw'aPentekosite. Moone, hiyo noovikana eyo. Siiso ntoko aMetotista yawiihan'aya aPentekosite, “alolo,” mwaha w'olavula ilavulelo. Siiso ntoko aLuterano yawiihan'aya aMetotista, “alolo,” mwaha w'okhuwela. Munnona?

Masi sothene iyo okhala wira enimoorwa Eroho Yowarya, mpakha Ekereja yuulupale okhala yoosareya, ni yoosarya, aleluya, [Munna Branham ommana vapulpitu vaara vaili—Mol.] owerya wuulupale wa Muluku Oowerya sothene. Mpakha, ephiyenry'aya nipuro miteko imosaru Yesu aavar'awe sinooniherey'aya naanaano va muKereja. Niri vakhiviru, apatthani.

⁴³ Mukihiye keemele vaava, minuutu mmosa paahi, kiphwanye mwaha wa xeeni Muluku ohenly'awe Eroho Yowarya muKereja,

woovahani eyooniheryo ekina wira musuwele. Ottuli wu mwa Waataana Wa Khalayi, okathi mwa—mwaana. . .

Mulopwana aamutthokiha etthoko. Owo aamukuxa mwaakameliwa awe, owo aakhala etthu yoopacerya.

Vano aakhala mulopwana muulupale, ntoko mutthenkeso. Eyo yaari yoreera.

Etthu yootharelana yiiraneya, waakhala oyara etthoko ele. Owo p'ukathi Eroho Yowarya, moone, erooho ekina yaamukela, yoowo aari mwaana. Mwaan'owo, owo khaarina owerya voomalela, nnakhala khaari mulipa-oorithi mpakha aphiyerere munnuwelo khata. Ni owo aahaana wehereriwa, toko. Ayo.

Vano nto awo yaahikhalana ekano ya okhalihiwa mwaana. Wa nyuwo arumeyi, "omukhaliha mwaana vooপুরoni," ti yeeyo enlavul'aka vano, moone, vano okathi aaphiyerery'awe okhalihiwa mwaana. Yesu oonivaha eyooniheryo yooreera ya yeeyo, Omwaako wa Orukunuwa.

⁴⁴ Ntoko sihimaly'aka, Muluku khonkhalakhala ahiyaka ikano Sawe wira apake etthu p'itthu.

Mwakhalana ehimye ya naattuuttu vasulu va mwaako *ola*, osukhumelaka maasi osulu wothene, nto mwaak'ola mukina *va*, mookhalana soolima sinoovya, nyuwo pooti weemela vasulu va mwaak'ola n'ukhuwela, "Oh, maasi, mmwareele nno munaanihe soolima saka! Oh, maasi, mukele mwa soolima saka!" Khivaniiraneya nnakhala. Masi mwavara-ru muteko muttharihaka ikano sa elemelelo, munoowerya onaaniha soolima iyo.

⁴⁵ Mwakhalana muretta ompaathale va, wala natampi omphwanyaneya va, wala mutthu omphavela okhala oratteene, ohinwerya ohiya ohapaliwa, ohinwerya ohiya onvura soona, ohinwerya ohiya wunlela itthu ni itthu sikina. Nyuwo mwavararu muteko muttharihaka ikano sa Muluku, itthuniherya Eroho Yowarya okela mmo, vano owo kahi a yoowo. Owo, owo onoohiya etthu iyo, okhala wira Eroho Yowarya t'enimuhoolela. Masi muhaana ovara muteko muttharihaka ikano sa Muluku, malamulo a Muluku.

⁴⁶ Vano, mwa Waataana Wa Khalayi, okathi mwaan'ola waayariw'awe, awo yaanimuwehexexa, wira emoone moota iisettih'awe, mweettelo.

Vano atiithi, ary'ene mulipa a nakoso muulupale okathi ula, khino ni iyaakha saya miloko mixexe wala miloko mithanu, awo khayaakhalana okathi wo omwiixuttiha mwaan'ola, mmansaya, tivo awo yaakhalana. . . Mahiku ale awo khayaarina ixikola s'anamunci-ene ntoko sikhalaniwaaya vano, tivo awo yaakhalana ole onihaniwa "mukhapeleli," wala "nammusuka," mwiixuttihi a oxikola. Vano mwiixuttihi a oxikol'ola aakhala

oolokaxa owo aakhanly'awe omphwanyaka, wira akhale oororomeleya ni omuleela tiithi ekeekhai.

⁴⁷ Vano nto okathi mmirav'ola aaphiyery'awe munnuwelo khata, niireke, aakhal'awe ookhomaala. Vakhala wira mmirav'owo aakhala ootakhala murima, oohifayi, khaacaliwa ni anakoso a atith'awe; sothene suupuwel'awe saari othweela ni okhumasa n'axithiyana, wala—wala owurya, wala omweetta cuuku, wala oxiraana n'ikhavalo; mmirav'owo aamukhala mwaana okathi wothene, masi owo khaakhalihwiwa vooপুরoni wira akhale mulipa-oorithi sothene atith'awe saarin'aya.

Masi owo akhala-ru mmiravo ooloka, ni oocaliwa n'anakoso a atith'awe, ni wooniherya wira aari mwaana ooloka, vano naanipakiwa niira. Aakuxiwa mmiravo khuroihwiwa mphironi khuwarihiwa ikuwo sootela, vano aaheliwa vattattaponi wira athu othene mmuttetheni emoone. Naapakiwa niira ni ohakalala, vano atiithi nto yaakhalana niira n'omukhaliha mwaana vooপুরoni. Owo aamukhaliha mwaana mwan'awe ene okela mwa anakoso awe, vano nto mwaana aakhala oolikana n'atith'awe. Mwa moolumo makina, waari ntoko olelo, nsina na mwaana vaxeekeni naarowa okhalaka ntoko n'atith'awe.

⁴⁸ Vano nwehe etthu Muluku iiraly'awe. Okathi oyariwaawe Mwan'Awē, Owo aamuhiyale okhala iyaakha miloko miraru, amwehereryaka, amootolaka. Vano Owo aahinvaha iyaakha tthaaru so wehereriwa woorika. Vano nto woomalani wo wehereriwa woorika, okathi Owo oonaly'awe wira Mwan'Awē aanicaliwa ni muteko w'Atithi; Mwaako wa Orukunuwa, Eliivuru ya Luka; Owo aahimukuxa Petru, Yakopo, ni Yohani, anamoona araru, khuwela vasulu vamwaako, nto vaavo Muluku aahooniherya ikano sa omukhaliha mwaana. Owo...Awo khuwehasa khumoonā Yesu, ni ikuwo Sawe saamwaarya sootela ntoko overunya. Vano Neeku nimosā nahimukhuneela Owo, ni Nsu nimosā naahikhuma Mmekuni, khwira, "Ola Mwan'Āka onimphentex'aka; mmwiiweleleke Yoowo. Kinookilaathi vano kihikhalane etthu y'ohimya. Etthu Owo onihimy'awe ti ikano ni Ekeekhai."

⁴⁹ Vano ekereja yoovira muxikola mmo. Eyo yaahitheliwa ottuli wu, khalayi saana, khukhala muromolelo, mutthenkeso. Masi, nwehe, Oyariwa wookumiherya etthu ekina. Nto vano yoophiyerya nipuro ekereja ya Pentekosite, ni Oyariwa vasya, enehereriw'aya ni wootoliwa, nto vano eniphiyerya nipuro... Muluku khonivara muteko ni Ekereja siiso ntoko mutthenkeso. Owo khonvara muteko ni Ekereja ntoko ni—nikhuru n'atthu.

Owo onivara muteko ni Ekereja ntoko atthu, khula mutthu mmosa muKereja. Nto vano woophiya okathi...Ni kehiyo esiiri; hiyo othene ninnoona. Mutthu eehereriwa vale, ni Muluku onamphenta, Owo onoomuroiha nipuro nlo wa Yoowo. Iwe ohoolo wa Malaikha Owo onimwiira etthu mwaha wa

yoowo. Owo onoomunnuwiha iwe Ohoolo wa Muluku, ni onvaha soovaha, n'umusariha, n'umpweha iwe. Owo p'ukathi onkhal'ahu.

⁵⁰ Eroho Yowarya emosa-ru yaawooponle aLuterano, yaareerihale aMetotista, yaapatisale aPentekosite, vano enoonthokiha Orwa wa Pwiya Yesu. Vano, enrowa okhala yoowerexa, Erutthu iyo, enrowa okela Nikhuru nla, Ekereja, enrowa waakumiha ale akina aya mmahiye. Onoorowa okhala ohihimuwa. Ti yeeyo ekhalenly'aya Eroho Yowarya. Eroho Yowarya exeenii? "Awo khanreerihwa voomalela nihikhanle hiyo." Awo yaahikhala mwa nihiku nimoso, vathi va yeeyo. Hiyo ninkhala nihiku nikina.

"Nwanani aarw'aka ntoko osarya wa maasi, Miyo kino. . . Eroho ya Muluku enoovenxa epantera yo owana-no." Munnona? Hiyo nri mwa nihiku vano. . .

⁵¹ Ottuli wu, awo khayaarisa hata nuusu a ankhili ntoko olelo. Awo khayaawerya opaka ekapwitthi ya aatomu wala ekaaro. Awo khayaarinasa siyensiya n'itthu ntoko sirin'ahu olelo, masi, ni itthu sa itthu sootikiniha; ophavela ohimya wira mutthu ophattunwe, ni nthupi wala etthu siiso, ni opaka soomwaleyasa ni ophavela wooniherya, wira yaakhalihe atthu oohaamini.

Masi vano, okathi onthun'ahu Yeeyo, Eroho ya Muluku enivenyiha epantera. Exeeni iyo? Owo onimwarexa Eroho Awe. Nto, ale anitthyuuwa wu mmahiye, wala vathi w'altaari a Muluku, ntoko sinihimy'aya Soolempwa, aninla, "Mpakha liini, Pwiya? Mpakha liini? Okathi xeeni ohanle?" Muluku onikilipelela miyo ni nyuwo. Ekereja enikilipelela miyo ni nyuwo. Okathi w'okhalihwa aana, okathi Muluku okhanly'awe omwaraxelaka mwa hiyo esarihelo Awe, Owerya Wawe, ohihimuwa Wawe, wira okathi Ekereja ni Kristu anrowaaya okhala oowiraanexa mpakha Kristu okhala oowooneya eriyari ahu, ni waahihimuxa alipa-ookhwa, ni hiyo Okuxiwa.

⁵² Vano ninrowa wira, ninimooniherya nuvira okathi vakhani, wira ale paahi asareiyee Eroho Yowarya t'anrowa Mokuxiwani mmo. "Anamukhwa akina khatthikenle-tho ekumi mpakha ovira iyaakha ekonto emosa." Ti yeeyo. Atthu oosareya Eroho Yowarya paahi othene ti yaakenle Mokuxiwani. Vano, Muluku oovaha Eroho Yowarya. . .

⁵³ Kihaana Yoolempwa ekina va, mwa Yohani 14:12. Eyo ti Yoolempwa yoosuveliwa n'atthu othene va mutapernakulu.

Vekeekhayi, vekeekhayi, kinooleelani wira, Ole onikaamini. . .

Vano, muhihiye nuulumo nlo "onikaamini" woohokoloxeryani ottuli. Mwa ekereja ene pure, eniiriwa, "Ayo, miyo kinnaamini. Khweli, kinnaamini wira Yesu Kristu Mwaana a Muluku." Xetwani onnaamini etthu emosaru yeeyo. Eyo ekeekhaii. Bibilia ohimye wira owo onnaamini.

Masi Yolempwa ennihimya, mwa Yohani, wira, “Khaavo oniwerya omwiihana Yesu ti Kristu, ahuupuxeriwe ni Eroho Yowarya.” Nyuwo, vekeekhai, ni Yolempwa... Mukihiye keemele vaava minuutu mmosa paahi, kihinatthi omaliha osoma. Nyuwo khamuhiyo oorukunxa murima mpakha mwaakhele Eroho Yowarya. Eyo ekeekhai.

⁵⁴ Nyuwo munaamini “mpakha.” Eroho Yowarya yoolavula ni nyuwo, nto nyuwo moomuhimya Owo v’atthuni. Xetwani ookhalana etthu emosaru yeeyo. “Kinnaamini wira Owo Mwaana a Muluku.” Xetwani ti siiso. Masi nyuwo muneetta murowaka wa Yoowo.

Okathi, Petru iitthaniw’awe khukhalihwiwa naxariya, mwaha wo omwaamini Pwiya Yesu Kristu; nto mwa Yohani 17:17, Yesu aahaareeraha ni Masu, maana Masu yaari Ekeekhaii. Ni Owo aari Masu. Yohani 1, onihimya wira, “Wopaceryani naari Nsu, nto Nsu naari ni Muluku, ni Nsu aari Muluku. Vano Nsu naahiipaka erutthu, khukhala ni hiyo.” Owo aari Masu, tivo Owo aahaareeraha. Owo iirale, “Tithi,” alavulaka ni Eroho mwa Yoowo, “Miyo kinnaareeraha mwa Masu,” Yoowo mwaneene, owiixaatheraka matata Awe. “Masu Anyu ti Ekeekhai.” Vekeekhai aaroomulavula Owo paahi khukhala, mmirimani mwa muthiyana; oh, voohiweryaneya mara Owo okhala enamuna ekina voohikhala Masu a Muluku ala wira emooniherye Yoowo. “Miyo kinnaareeraha.”

⁵⁵ Owo aahaavaha owerya w’oxintta irooho sootakhala. Awo khurwasa. Owo ohenle masin’aya muLiivuruni mw’Ekumi ya Mwaapwittipwitthi. Vano Owo aahaaruma, Yohani... Matewu 10, ni khwaavaha owerya w’oxintta irooho sootakhala; woomola irooho sootakhala, n’uvara miteko, ni sikina. Vano awo yaahihokolowasa, etthapaka, khwira, “Hata axetwani yaaniniwelela.”

Owo khwira, “Muhitteeliwe murima mwaha wa axetwani owiwelelani; masi mutteeliweke murima mwaha wa masin’anyu okhala muLiivuruni.” Vano Yuta aari ni yaawo. Munnoona moota okhanly’awe olattanaka; aahiphiya vookhalihwiwa naxariya, khurwawa mpakha oreerihwiwa. Masi owo oonihenrye vayi muthuko awe? Owo iisoonihernye vayi? Pentekosite ohinatthi, owo aahooniherya nikhuli nawe.

⁵⁶ Nwehe, erooho eyo enrowa okhala ntoko yooreera murima ni y’enamirima miili ntoko sinweryaney’aya okhala, mpakha ophiyerya Eroho Yowarya, nto awo anrowa othikila Eyo vaavo vene. Ti siiso erooho eyo (khamunwerya wooná?) erowaka, nwanani a Kristu. Nto Yesu oohimya, “Saarowa okhala soolattana, mahiku ookiserya, saarowaaya owootoha ale Oothanliwa vaakhanle wira vaaniweryaneya.” Masi, muupuwele, alipa Oothanliwa paahi t’anrowa wooná.

Muluku oniitthana ni othanla. Nyuwo, khamutteeliwe murima nyuwo okhala mmosa a yaawo? [Muthukumano oniira, “Amen.”—Mol.] Khamuhiyo, nyuwo atthu va ohiy’ula, musuwelaka wira etthu mmurimani mwanyu ennivura, “Kintthuna Eroho Yowarya yeeyo. Kinootthunani nyuwo, Pwiya, mmurimani mwaka”? Okhala wira Muluku oroohela nsina nanyu muLiivuruni mw’Ekumi ya Mwaapwittipwitthi ohinatthi opattuxiwa olumwenku. Owo oohimya eyo.

“Khaavo onwerya orwa wa Miyo,” ohimye ti Yesu, “ehikhanle wira Atithi Aka anoomuruuha toko. Ni othene ale anoorwa wa Miyo, Miyo kinimwaavaha Ekumi Ehinimala.” Ekumi Ehinimala exeenii? Eroho Yowarya. “Ekumi Ehinimala,” mukuxe nuulumo nlo nto mphavele mw’Ekereku, ehimye, *Zoe*. Zoe ti Eroho Yowarya. “Othene ale Atithi akivahaly’aya animoorwa wa Miyo. Ni othene ale anrwa wa Miyo, Miyo kinimwaavaha Eroho Yowarya, ni kinimwaahihimuxa nihiku nookiserya. Miyo kinimwiira,” Owo oohimya. Kahi khino mmosa wala alakela kinimwiira. “Miyo kinimwiira. Othene ale anoorwa; nto Miyo kinimwaavaha Ekumi Ehinimala.” Owo ohaana ohihimuwa, okhala wira ohaana Ekumi Ehinimala. Owo ohaana orwa. Khivanweryaneya-tho owo okhwa siiso Muluku ohinikhw’awe.

⁵⁷ Oh, apatthani aka oophentiwa a elapo ela yothene ni epooma ela yaamukhaani, vaakhanle wira kaamuwerya paahi, ni nsu naka na mutthu, okeliha mmurimani mwanyu oyuulupalexa wo waakhela opatiiso wa Eroho Yowarya, waamukhala muupululo wooreerexa mutonko anyu okhalana mookhalaru. Wona etthu . . . Muhaana wira.

Mukihiye kilakiherye yeeyo, ya, “Khamurukunxale murima.”

⁵⁸ Petru aahoopowa. Owo aaniwaamini Apwiya, aanaatthara Yaawo. Yesu aahimuleela wira owo aari pani, aahimwiiriha omutthara Yoowo. Aahinvaha owerya w’oxintta iroho sootakhala ni aahimureeriha. Masi mwa sothene iyo, ni aahikhala meyamuhupi muulupale a nikhuru; ntoko aKatolika yaarowaaya othuna wihana, “pixipu a ekereja, wala paapa,” wala etthu p’itthu, mukhulupale a ekereja; nakhala vo Yesu aahihimya, ohiyu wo olupatthiwa Wawe, “Munnikiphenta Miyo, Petru?”

Nto owo khwira, “Pwiya, Nyuwo moosuwela wira kinnoophentani.”

Khwira, “Mulyihe ipwittipwitthi Saka.” Owo aahimye eyo imaara tthaaru.

Nto Petru khwira, “Nyuwo moosuwela wira kinnoophentani, mpakha kinoorowa ni Nyuwo mpakha wo—woomalelani, ni kinoorowa ni Nyuwo mpakha wokhwaani,” ni siiso.

⁵⁹ Owo khwira, “Muthupi ohinatthi wiipa imaara tthaaru, nyuwo mu...muthupi ohinatthi wiipa, nyuwo munookiruna imaara tthaaru.” Owo khwira, “Masi, Petru, Miyo kihoovekelelani.” Nwiryane. Khemmalela vaavo. “Miyo kihoovekelelani. Vano nyuwo mwarukunuxa murima, nto mwaalipihe axinn’inyu.”

“Mwarukunuxa murima.” Owo aahikhuwela. Alakela aahiina mwa Eroho. Owo, owo aahiira itthu inamuna sothene, masi aira ahinaakhele Eroho Yowarya nlelo. “Mwarukunuxa murima, nto mwaalipihe axinn’inyu,” eyo ekeekhai, “okelela ohoolo ni etthokiheryo Awe.”

⁶⁰ Vano mukihye kimalihe omusoma Yohani 14:12. Vano kapiitulu 14 ni versiikulu 12, Yesu oohimya, “Vekeekhayi, vekeekhayi, kinooleelani wira, ole onikaamini...” Ni khamukhanle waamini...“Onikaamini Miyo.” Munooverya waamini *mpakha* wa Yoowo. Akavi anaamini yeeyo? Yiire, “Amen.” [Muthukumano oniira, “Amen.”—Mol.]

⁶¹ Munnuupuwela, Miteko 19. Okinanara ohiyererya yeela vaava, masi kihaana ohimya tu okathi enikirweel’aya. Miteko kapiitulu 19, okathi mulaleyi muPatista ola, yoowo aari mu—mulapeli ni aarukunxale murima, ni aamulaleerya ni waaphiherya atthu woopowa. Vano awo yaanihakalala vanci-ene, etthapaka paahi ni okhuwela, okhalana muthukumano. Miteko 18, Akila ni Prisila, naahihimya yeeyo nsana ohiyu, nto awo yaaroorowasa omoona yoowo. Nto awo yaahisuwela wira owo aari mutthu muulupale, ni aari naxikola. Vano owo aamooniherya ni Bibilia wira Yesu aari Mwaana a Muluku, asuwelaka paahi opatiiso wa Yohani. Owo khaasuwela opatiiso wa Eroho Yowarya nlelo. Tivo owo khwira . . .

Akila ni Prisila, iya ni mwaara, anamapaka iheema; yeeyo, Paulo aary’awe namapaka iheema, nave. Nto awo yahaakhelasa Eroho Yowarya vathi va mwixuttiho wa Paulo. Awo khwira, “Nookhalana munna mmosa mwaamukhaani onrwa weno. Mmuhiye anleeliherye vakhani mwaha wa yeeyo.”

Nto okathi Paulo oruuly’awe khumwiiwa alaleyaka, aahisuwela wira aari mutthu muulupale, owo khwira, “Muhaakhela Eroho Yowarya okhuma okathi mwaaminni anyu?”

Awo khwira, “Hiyo khanisuwenle wira...sinto yookhala Eroho Yowarya.”

Owo khwira, “Vano ni exeeni,” wala nuulumo n’ekeekhai na Ekereku vo ti, “mupatisiwe sayi?”

Awo khwira, “Hiyo noopatisiwa ni Yohani Mpatisa.”

⁶² Vano nwehe etthu Paulo aahimaly’awe. Paulo iirale, wira, “Yohani vekeekhai aapatisa mwaha w’orukunxa murima; kahi

wa oleveliwa itampi, masi mwaha w'orukunxa murima, ahimyaka wira eyo t'ile mwaaminni anyu."

Okathi onimukupaly'anyu Kristu ntoko Moopoli anyu, munaamini *wa* opatiiso wa Eroho Yowarya. Eyo kahiyo opatiiso wa Eroho Yowarya, munn'aka oophentiwa muPatista. Yoovonyeya.

Munna mmosa aahikileela nihiku nlo, khwira, "Munna Branham," wala okathi uwo ovinre, miyeeri sivinre, owo khwira, "Munna Branham, Abrahamu aahimwaamini Muluku, vano khukhalihwa naxariya."

Miyo khwira, "Vekeekhai."

Khwira, "Exeeni-tho mutthu okhanly'awe wiiraka woohikhala waamini?"

⁶³ Miyo khwira, "Ti yeeyo tu mutthu okhanly'awe wiiraka. Ti yeeyo tu okhanly'awe wiiraka olelo, omwaamini Muluku. Masi Muluku aahinvaha ekanyeryo ya olyihiwa masoma," yeeyo naalavunly'ahu nsana ohiyu, "ntoko ekanyeryo wira Owo aahikupali omwaamini wawe Yoowo." Ni, olelo, mpakha Muluku . . .

Nyuwo munaamini wa yoowo okathi munimukupaly'anyu Yoowo ntoko Moopoli anyu. Masi okathi Muluku onoovahaaweni ekanyeryo ya Eroho Yowarya, Owo ohootthittani mpakha ekiseryo anyu Ehinimala. Vano nyuwo aPatista mukuxe eyo, nto kinimwiiraana ni nyuwo mwa nrromelo Ohinimala. Ayo, mulopwana. Okhala wira, "Muhiriipihe murima Eroho Yowarya ya Muluku, yeeyo mutthittiw'anyu ekanyeryo mpakha nihiku no woopoliwa wanyu." Khamunthittiwa ekanyeryo mwaha wo waamini *wa*, masi otthittiwa ekanyeryo ni Eroho Yowarya. aEfeso 4:30, "Muhiriipihe murima Eroho Yowarya ya Muluku, yeeyo mutthittiw'anyu ekanyeryo mpakha nihiku no woopoliwa wanyu." Eyo ennoothittani ekanyeryo, mwaphwanya-ru ocaaliwa wa Muluku, nto Owo ohootthittani ni Eroho Yowarya.

Ti siiso, okhala wira Biblia oohimya, "Khaavo onwerya omwiihana Yesu ti Kristu, ahuupuxeriwe ni Eroho Yowarya."

⁶⁴ Nyuwo muniira, "Miyo kinnaamini okhala wira pastore ohimye siiso." Owo ookhalana exariya, masi khenihimya etthu wa nyuwo. "Miyo kinnaamini okhala wira Masu anihimya siiso." Ti yeeyo, masi eyo kahiyo yawinyu, eyo khenihimya etthu wa nyuwo.

Enamuna emosa paahi mukhanly'anyu wira Yesu ti Kristu, p'ukathi Eroho Yowarya enrwaaya mwa nyuwo n'ukhalela onamoona, ni yeeyo Eneene okhala namoona, "Owo Mwaana a Muluku." Eyo t'inamuna emosa paahi munsuwel'anyu ohihimuwa, okathi Eroho Yowarya enkhale'aya onamoona. "Okathi Eyo Eroho Yowarya enrwaaya, Eyo enookikhalela onamoona Miyo, enoowooniheryani itthu sinrowa

orwa; enooruha itthu iya, kihimmy'aka, ewuupuxeryeni." Khamunkhalakhala mphwanyaka muxikola. Munnona? Eyo enoowuupuxeryani itthu iya.

⁶⁵ Vano nintthuna nisome nirowaka ohoolo vakhani mwa Yoolempwa ela vano, Yohani Oowaarya 14:12.

Vekeekhayi, vekeekhayi, kinooleelani wira, Ole onikaamini, onoovara miteko sinvaraaka nave-tho; ni suulupalexa . . .

Yeeyo, otaphuleliwa woolikana vo okhanly'aya "soowaatta," mwaatthunaka vale ophavela.

. . . miteko suulupalexa ovikana iya onoovara; maana miyo kinrowa w'Atithi.

⁶⁶ Vakhala wira Owo aaronwe w'Atithi, Eroho Yowarya yaamoorwa. Eyo ekeekhai? Yoolempwa ekina ehimye wira, "Miyo kaahirowe-ru, Mulipa-ookhaliherya khonrwa. Masi Miyo karowa, kinimoorwa-tho kikhale ni nyuwo, hata mwa nyuwo." Moone, ti Muluku ni nyuwo. Vasulu vanyu, toko; ni nyuwo, mwa Kristu; mwa nyuwo, mwa Eroho Yowarya. Ti Muluku mwa nyuwo.

⁶⁷ Vano, "Miteko sinvar'aka nave-tho nyuwo munoovara," kahi muteko mukina. Masi Muluku ontthuna oruha Eroho Yowarya, mwa nyuwo, wira ethhikele muteko mmosaru Eyo yaavar'aya mwa Kristu.

Miteko khayaatthuneyexa mahiku a Lutero. Eyo yaari Ekereja ya Muluku. Khayaari . . . Saanitthuneyexa vakhani mahiku a Wesley.

Okhala wira, "Olumwenku," Bibilia ohimye wira, "waarowa okhala wootteethaya, woosuwelexa, ni wootepa otakhala okathi wothene." Hiyo nri . . . Olumwenku onootepa okhalaka wootakhala wothene . . . Hiyo noosuwela eyo. Vano, atthu anniira itthu olelo seiyo, iyaakha emiya khalayi mwahaarowaanyu wupuwelela wira aamukhala mutthu akhalaka ootakhala siiso. "Anootepa otakhala okathi wothene, nto ootakhala onrowa okhalaka ootakhalexa, okathi wothene," Yoolempwa yoohimya, "otepaka otepaka."

⁶⁸ Tivo, Eroho Yowarya enimweetta. Yaari emumulelo ekhaani paahi ya Yeeyo ni Lutero; emumulelo ekhaani ya Yeeyo ni Wesley; ni emumulelo yo wiixeraxa ya Yeeyo ni Pentekosite; vano emumulelo ni Eroho yookhala emosa-ru. Eyo enootakanxana vamosa, ekumiheryaka emumulelo emosaru yeele ya ikuru sa Eroho Yowarya ntoko Owo siiraly'awe ottuli wu, enooniherya miteko imosaru Owo iiraly'awe ottuli wu, sooniheriwaka olelo vaava, etthu emosaru.

⁶⁹ Nkawehani etthu Yesu ohimaly'awe: "Vekeekhayi, vekeekhayi kinooleelani wira, Mwaana khanwerya wira etthu ehikhanle wira Owo onoowoona Atithi yiraka toko. Ele aniira

Atithi, Awo annimooniherya Mwaana. Atithi ankhala mwa Miyo; Awo t'anvara miteko." Munnona?

⁷⁰ Vano nwehe, yookhala etthu ekina va kaatthun'aka wira kihimye vaava. "Ntoko," Yesu oohimya, "ntoko Atithi vakirumyaya Miyo. Ntoko," vano nwehe, "ntoko Atithi vakirumyaya Miyo, ni Miyo kinimoorumani nyuwo." "Ntoko Atithi. . ." Atithi yaamurumme sayi Uwo? Atithi, yaamurume Owo, yaahikhuruwa okhuma Wirimu khukhala mwa Yoowo.

Owo aahikhuma. Owo khwira, "Miyo okathi wothene kinniira itthu sinaasivela Atithi Aka." Munnona? Owo eetta avaraka itthu Atithi yaamoonih'aya wira Owo avare. "Miyo nkiniira etthu ehikhanle wira Atithi Aka anookooniha toko." Muluku yoowo aamurumme, aari muhina mwa Yoowo. "Nto ntoko Atithi akirumyaya Miyo, siiso Atithi akirumyaya Miyo, ni Miyo kinimoorumani nyuwo." Exeeni iyo? Muluku mwa nyuwo, aroi helaka ohoolo (exeeni?) miteko imosaru, imosaru.

Yesu ohimye wira, "E. . . ole *onaamini*, ole orina Miyo muhina mw'awe, Eroho Yowarya; ole *onaamini*, okhalenle onamoona ohihimuwa Waka, onnisuwela wira Miyo kiri mwa yoowo. Ole ori mwa Miyo; nyuwo mwakhala mwa Miyo, Masu Aka yakhala mwa nyuwo."

⁷¹ Vano nyuwo muniira, "Miyo kinkhala mwa Yesu; masi vekeekhai nkinaamini ovoniha wa Muluku." Eyo enooniherya wira Owo khokhanle mmo.

⁷² "Miyo kinnimwaamini Yesu; nkinaamini Eroho Yowarya mahiku ala, kahi ntoko yaakhalaniwaaya ottuli wu." Eyo enooniherya wira Owo khokhanle mmo.

⁷³ Eroho Yowarya enookhalela onamoona Masu othene Eyo elavunly'aya. Eyo kehiyo nawoothe. Eyo khenimoova mutthu wala mutthenkeso. Eyo kherina omaalaka mwaha wa mutthu. Eyo enoolavula, vano nto Eyo enkhala ni yeeyo.

Vakhala wira ale oowiihelana, ni oopahuwa, ni oosoma, wala ntoko saarowaahu wiihana, akhulupale mathaaciri, awo yaahitthune waakhela Eyo, "Muluku onniwerya ni maluku ala waavenxa ana a Abrahamu." Owo onimwaakuxa anamatuphela, ni anamatumiha eviinyu wiphiini, ni itthu sothene sikina, ni onimwaavenxa. Muluku onniwerya wira, nto Owo onimwiira. "Muluku onniwerya ni maluku ala waavenxa aana a Abrahamu." Mutthu onrowa wira, okhala wira Owo Mulukuu.

⁷⁴ "Nyuwo mwakhala mwa Miyo, nave Masu Aka mwa nyuwo, nvekeleke etthu entthun'anyu," okhala wira munvekela Masu Awe, nto Masu Awe Ekumii. Muhimye. Vakhala wira Muluku oohimya, ni nyuwo mookupali wira Owo oohimya, Eroho Yowarya ennikhalela onamoona wira Masu awo t'ekeekhai, nto, eyo vo, munna. Muhimye; eyo vo. "Mwiirele mwaak'ola, 'Othaame-vo,' Muhihoverye mmurimani mw'anyu, masi mwaamini wira muhimyanyu enimwiiraneya." [Munna

Branham onooopa ikuphi imaara tthaaru—Mol.] Khamuhiyo nyuwo munlavula, masi Atithi ankhala mwa nyuwo; Awo t'anlavula. Khamuhiyo nyuwo munlavula ni mwaak'ole, t'Atithi ari mwa nyuwo, anlavula ni mwaak'ole. Ohaana okhuma. "Erimu yothene ni vathi sinoovira," Owo oohimya, "masi Eroho Aka kheni...kiireke Masu Aka khanvira." Vekeekhai, Awo khanvira. Tithi!

⁷⁵ Vano, "Miteko Miyo sinvar'aka." Muluku ori muKereja mw'Awe, wira akeleliheke ohoolo miteko Sawe. Mwaha wa yeeyo Owo oveleelihaly'awe Eroho Yowarya. Vano, Owo aahisuwela eyo. Owo, Owo aahisuwela wira khiyaarowa okhala, khiyaakhanle wiiriwaka siiso, hata enamuna ekina, tivo Owo aahaana oveleeliha. Atithi yaamurumme Mwaana, khuhela sothene saari mwa epha-...Mwaana mwa nyuwo. Vano miteko imosaru Owo aavar'awe, miteko sene seiyo vano Yesu aavar'awe, nave-tho nyuwo munoovara, Ekereja.

Khamwaatthuna ovara miteko sa Muluku? [Muthukumano oniira, "Amen."—Mol.] Yesu oohimya, "Mwaatthunaka ovara miteko sa Muluku, mukaamini Miyo." Munimwaamini sayi Yoowo? Khamunwerya wira muhaakhenle Eroho Yowarya.

⁷⁶ Okhala wira, khaavo onwerya wira Owo Mwaana a Muluku; nyuwo munihimya etthu ohimye mutthu mukina. "Bibilia ohimye wira Owo Mwaana a Muluku; kinimwaamini Bibilia." Vaareera. "Bibilia onihimya wira Owo Mwaana a Muluku; kinimwaamini Bibilia. Pastore onihimya wira Owo Mwaana a Muluku; kinimwaamini pastore. Amaama anihimya wira Owo Mwaana a Muluku; kiniwaamini amaama. Mpatthani aka onihimya wira Owo Mwaana a Muluku; kinimwaamini mpatthani aka."

Masi enamuna emosa paahi kinwery'aka wira Owo Mwaana a Muluku, p'ukathi Eroho Yowarya enkel'aya n'ukhalela onamoona Eneene, vano kinoosuwela wira Owo Mwaana a Muluku. [Munna Branham omanne vapulpitu imaara xexe—Mol.] "Khaavo onwerya omwiihana Yesu 'Kristu,' ahuupuxeriwe ni Eroho Yowarya."

⁷⁷ Huh! Khaavo mutthu onlavula ni Eroho ya Muluku omwiihanne Yesu ootakhaliwa, wala wira Owo aari etthu emosa ya nihiku nle vano etthu ekina olelo. Eyo ennimukhaliha Owo ootteetheya ni oovonya. Nnari, mulopwana.

Owo mmosaru nsana, olelo, ni mahiku othene. Eroho yothene y'ekeekhai enookhalela onamoona yeeyo. Vaareera.

⁷⁸ Vano, Owo oohimya, "Miteko iya Miyo sinvar'aka nyuwo munoovara nave," Yohani 14:12, vano, miteko imosaru.

"Oh," awo aniira, "ekereja ennivara muteko muulupalexa olelo." Mwa enamuna xeeni?

Owo ohimye wira, "Miteko Miyo sinvar'aka."

“Wira,” awo aniira, “ahe, hiyo nookhalana mamisiyonariyu mulaponi mothene, owo muteko muulupalexa.”

⁷⁹ Masi Owo ohimye wira, “Miteko Miyo sinvar’aka.” Vano nvare seiyo, nvare seiyo toko, nto mulavuleke sa mamisiyonariyu.

⁸⁰ Olelo, nilavulaka nno okathi mmosa ovinre mwaha wa Mmaka mmosa, owo khwira, “Muhammad ohookhwa.”

“Eyo ekeekhahi, owo ori mmahiye, masi nihiku nlo owo onohihimuwa.” Owo khwira, “Owo ahihimuwa-ru mmahiye, olumwenku wotheene onoosuwela muhina mwa iwoora miloko miili ni xexe.” Owo khwira, “Nyuwo atthu muniira wira Yesu ohihimunwe iyaakha ikonto piili, nto epantte ya neeraru y’atthu khansuwela nlelo.”

Eyo okhala wira nyuwo mulavunle mwa moonelo mmosa w’otthokelela. Nyuwo mulavunle mwa moonelo mmosa w’oxikola wala osoma.

Vaakhanle wira ekerej’ela, yothene yuulupale ya Muluku, owaalaka aKatolika, aPrustante, vamosa, yaahaakhela Eroho Yowarya, olumwenk’ula waamukhala woolipa mwa oKristu; khiyaarowa okhala etthu iyo ntoko komunisimu; khiyaarowa okhala etthu ene eyo ntoko ikhotto, wala owanani, nnakhala otakhala murima, wala onyokhana. Yesu aarowa okilaathi Veehiceni Vawe, ni aarowa weettaka aviraka mparatiiso wa Muluku, ni Ekumi Ehinimala, nikhalaka voohimala; oohihimuwa-ene m’werutthuni esya, neettakasaka, wo ohuuluvala-tho, wo ohikhalana-tho maihi oottweelela, wo ohiwereiwa-tho, wo ohivoliwa-tho etala; neettaka moopuhani mw’Apwiya, nilavulaka n’axinama. Ni, oh, nihiku xeeni nlo! Masi ninniira sothene sikina ohiya ele Owo. . .

⁸¹ Owo ohimye wira, “Murowe mulaponi mothene mwalaleye Ehapari yooreera.” Ehapari yooreera eniira exeeni? “Kahi Masu paahi, masi mwa Owerya ni wooniherya wa Eroho Yowarya.” Okhaliha Masu a Muluku wooniherya, ti Ehapari yooreera.

⁸² Mutthu khanwerya wira. Vano, Yesu aanisuwela eyo, wira Owo aahaana okhala muKereja mw’Awe.

Tivo, Owo aanisuwela wira naamukhalana ixikola s’ankhili. Ni nyuwo khamunkhalakhala mphwanyaka Ela muxikola s’otthokelela. Awo anrowa ovirikanyaka Yeeyo. Okhala wira, sothene ansuwel’aya mwiixutto wa mutthu oosuwelexa, eyaaminelo wala muromolelo antthun’aya o—okhala mwa yoowo. Tivo awo ani—animookhalihani memmo khookhalihani wira mpantte w’erutthu yeeyo, nto, munna, woohimeeryani itthu kamosa-kamosa sa eyaaminelo saarowa okhala ntoko saari soolikana. “Ekereja yuulupale yoowaarya, mai aya, yoovilela omaniwa vanci-ene, yoovilela otupheliwa vanci-ene.” Nave-tho xetwani; owo onnoomoliwa mapuro othene akhanle, ntoko, nto

owo onoothikela arowaka nnakhala vo. Ayo, mulopwana. Oh, awo anrowa weererya ohimya seiya.

⁸³ Tivo Yesu aanisuwela wira waamukhala mweetelo muulupale w'otthokelela siiso ntoko waakhanly'aya mahiku Awe, oocaliwa n'urapiha miyaapu ni makapu, ni owara ikuwo, ni mikala soorukunxiwa, ni sothene ntoko awo yiir'aya, itthu iya sothene soohiyana-hiyana awo yaarowaaya wira. Owo aanisuwela wira awo yaarowa wira yeeyo, tivo Owo iiraly'awe, "Vano nwehererye minuutu mmosa paahi. Nkinrowa woohiyani ikwaasuni, Miyo kinimoorwa-tho okhala ni nyuwo. Tivo," Owo iiraly'awe, "miteko Miyo sinvar'ka, nyuwo munoovara nave."

⁸⁴ Etthunelo yo oveleliha Eroho Yowarya yaari wira Muluku atthikele eriyari wa nikhuru n'atthu, otthikela omooniherya Muluku molumwenkuni. Eyo ekeekhai. Kahi ni eyaaminelo, kahi ni muromolelo, masi ni Owerya w'ohihimuwa Wawe, akhalihaka Masu Awe eekeekhai; mwa omukuxa natiri Awe, n'ukhala epante y'ale vakhani, ni emwaaminiki Muluku; nto nkawehani osulu wooriipa otthikela ottuli, ni Owerya wa Muluku okela n'uxintta. Amen. Ti yeeyo Owo onthun'awe. Ti yeeyo Eroho Yowarya eveleliheriw'aya. Eyo ti etthunelo Owo ovelelihenry'awe Yeeyo. Hiyo noosuwela wira Eyo exeeni vano, nto mwaha wa yeeyo Owo ovelelihenry'awe.

⁸⁵ Tivo, khiyo hata ephome ekina yaarowa waareeriha atthu. Nkaakhanle owerya wooreerihani, ni nyuwo khamwaakhanle owerya okireeriha miyo, okhala wira hiyo oowaili niyariwe mwaha w'ekhapa. Masi Yesu oyariwe vookhkhala ekhapa, vekeekhai, tivo Ephome Awe yaari yooreeriha. Ni Muluku aahikhuruwa, khupaka erutthu, khukhala memmo, khumwarexa Ephome eyo wira ereerihe ela, yeeyo yoomonle voomalela ottheka wa etampi ni ehaaya. Vano, mwa waamini, waamini Yeeyo, Muluku onookhuruwela erutthu yeeyo ya mutthu, mwa oreeriha w'Ephome yeeyo, onimukhaliha Osuulu w'Abrahamu, mwaha wo waamini.

⁸⁶ Waamini wira Ephome eyo yaamoora, Ephome eyo yooloka yaarowa okhala mwiiriirya ntoko ephome awe, eettale iwo "owo aari ntoko ookhwa." Aamwaaminni Muluku wa iyaakha miloko miili ni thanu, owo ni iyaakha miloko mithanu na miili ni thanu, ni aahaamini mpakha ophiya iyaakha emiya. Ni Sara, miloko mithanu na mosa ni thanu, ni aahaamini mpakha iyaakha miloko mithanu na mixexe. "Ni owo aari ntoko ookhwa."

Vano Muluku khwira, "Wira akupali wira atthu ehihaleele, mmuruuhe va vamwaako munvahererye ntoko mukuttho."

⁸⁷ Owo khwaahimeerya arumeyi, "Nyuwo muhalase vaava ni mwaapuru mulipelele. Mwaana ni miyo ninrowa iwe olompa, nto mwaana ni miyo nnoothika." Oh, owo onrowa wira sayi?

Abrahamu iirale, "Miyo kimwaakhenle ntoko mmosa w'alipa-ookhwa. Ni koosuwela wira Ole okivahale, ntoko mmosa

w'alipa-ookhwa, onniwerya omuhihimuxa mw'alipa-ookhwa keettela-ru Masu Awe paahi. Weettela, keettela-ru Masu Awe; Owo onniwerya omuhihimuxa mw'alipa-ookhwa.”

⁸⁸ Amuhimiyaka oratteene Kristu! Owo ori vo. Nto mwa erukuruku yeele y'Ephome khurwa Eroho Yowarya, yeeyo yiikhunenle Eneene mw'erutthuni yihaniwa Yesu. Ephome eyo khureeriha ephiro, mwaha wo waamini, wira ewiihane ale oovuluxiwa, wala Oothanliwa a Muluku. Nto okathi munkupaly'anyu Yeeyo, ni Eroho Yowarya enikumihaya etakhalelo murima yothene mwa nyuwo, Eyo enookela mwa nyuwo, Muluku Mwaneene, wira avareke otthuna Wawe.

⁸⁹ Wenno nno, mukhulupale ola ootakhala oonanariwa; ni *lexe ni lexe* ola mukina nno oniira *elexe ni elexe*; ni mutthu *ula* onlavula mwaha wa Yeeyo, voovirikanya Yeeyo. Mutthu osareiyiye Eroho Yowarya onookhala ohoolo wene wa yeeyo. Amen.

⁹⁰ “N'awo yaahiweha. Awo yaari oohisuwel'etthu ni oohisoma, masi yaahiweha wira yaahikhalasa ni Yesu.” Ti yeeyo Eroho Yowarya erwenly'aya.

⁹¹ Mutothi mmosa a ihopa ahaawerya olepa nsina nawe. Masi aaheemela vale khwira, “T'ani onrow'ahu omwaamini, mutthu wala Muluku?” Amen. [Munna Branham ommama ikuphi emaaara emosa—Mol.] “Musuweleke wira, hiyo nlelo ninrowa olaleya mwa Nsina na Yesu.” Wulu, ominyala xeeni! Owo aahisuwela wira owo—owo aahikhalana Ethhoko epantte ekena. Ti yeeyo. Owo aari nawetta ni mmalapo nno. Owo aaphavela Muttetthe onoorwa.

Exeeni yaamucala mwaha wa namukuttho namirima miili? Owo aari vathi va owerya wa Muluku a Wirimu, omuhihimunxe Mwan'Awe, Kristu Yesu, khimusariha Eroho ya Muluku opattunxe erimu n'ilapo ya vathi. Eyo vo. Owo khaamoova. Nnari, mulopwana. Okhwa . . .

⁹² Vano, okathi amukumihenry'aya Sitefano iwe, khwira, “Mukairi etthu iyo!”

Owo khwira, “Nyuwo oolipa murima, ni oohinnuwiihiwa mmurimani ni oopisa wiiwa, nyuwo okathi wothene munikhootta Eroho Yowarya. Ntoko siiraly'aya axitiith'inyu, ni nyuwo muniira siiso.”

Awo khwira, “Hiyo nnimoomanani mpakha okhwa!”

Owo khwira, “Khamunwerya wira vakhala wira . . .”

“Ninoowooniheryani sintoko nnimwiira wala nnari!” Vano awo yaahikuxa maluku maalupale khupacerya ommana vamuru.

⁹³ Owo khuweha osulu, khwira, “Kinnoona Erimu etthukunwe-ene. Kinnoona exikatta ekhuruwaka. Kinnimoona Yesu ary'ene moonoo woolopwana wa Ovuwa Wawe.” Vano Bibilia khohimmye wira owo aahikhwa; owo oroorupa. Oh,

wulu! Kinniwerya woona Nlaikha nikhuruwaka, omukuxa ni omweepesa ntoko mwaana, maama, mpakha owo orupa. Oh, wulu! Vekeekhai.

⁹⁴ Eyo ti ethhunelo ya Eroho Yowarya. Mwaha wa yeeyo Muluku ovelelihenry'awe Eroho Yowarya. Eroho Yowarya erwenle woovahani Owerya. Kookhalana-tho Soolempwa kamosa-kamosa va, minuutu mmosa paahi. Eroho Yowarya erwenle woovahani Owerya. Miyo—miyo nki. . . Nyuwo munoowerya ophwanya ela; miyo nkireere opisa, ohiy'ula.

Woovahani Owerya, Owerya mwa mavekelo!

⁹⁵ Mmukuxe mutthu okhanle makhalelo ooreera, masi awo anoointtiwa khula okathi. "Oh, kinimooleelani. . ." Mutthu ooloka, "Oh, vekeekhai, miyo kinnaaphenta Apwiya, Munna Branham." Khula okathi oxinttiwa, awo khanakhalaneke mavekelo oowaakhuliwa.

Mmusarihe muthiyan'owo Eroho Yowarya emaara emosa, nwehe ethu eniiraneya. Owo aarowaka ohoolo wa Muluku, khonxinttiwa. Owo onrwa ahoovaka ethu Veehiceni va Muluku, aaminiki. Owo ohaana ehaakhi okhala wira mwaana a Muluku, mwaha wo Oyariwa.

Mmukuxe mwaamulopwana owo, oowoova, mukhulupale onimoomolela nno ni nno. Onimwiira, "Nwehererye minuutu mmosa va vano." Yookhala ethu erukununwe, moone, owo ohaakhela Eroho Yowarya. Eyo enoovahani Owerya. Makhalelo anyu t'osareya Owerya.

Eyo enoovahani Owerya mwaalavulaka.

⁹⁶ Vano, wulu, atthu ale yaari oowoova, yeemenle-ene vale; Petru, Yakopo, Yohani, Luka, n'akina aya othene. Awo yiira evolonwe-ne empa y'osulu, yiiraka, "Oh, khaninwerya olavula-tho. Awo, nkawehani vale, ookhala Totori *Lexe ni lexe* ni lexe iwe. Ookhala Rabbi *Lexe ni lexe* ni lexe. Moosuwela, owo aahikhalana ikharawu xexe s'okoleexiyu; ninrowa onvirikanya sayi uwo?" Petru khwira, "Oh, kinnuupuwela kitumihaka ihopa nihiku nimosa. Owo, owo aahilavula, nave nkaasuwela ethu aahimy'awe. Oh, nkaawerya hata onvirikanya." Masi exeeni. . .

"Niireke exeeni, axinna?"

"Owo khwira, 'Mulipelele.'"

"Ahe, hiyo nookhala mu mahiku maxexe."

"Mukhale mulipelelaka paahi."

"Mpakha liini?"

"Mpakha."

"Ahe, Owo aahimye wira mpakha nihiku na neethanu?"

"Owo khonahimyeke okathi ene. Owo iirale, 'Mpakha.'"

Ahe, awo yaahikhala elipelelaka. Okathi xeeni? “Mpakha.” Mahiku mathanu na mararu khuvira. “Mpakha.” Mahiku mathanu na maxexe khuvira. “Mpakha.”

Nto vookiserya vaaphiyaly'aya nihiku na Pentekosite, voomalela, awo yaari othene nipuro nimosa, ni mwiiwanano mmosa.

⁹⁷ Muluku aahikhala vasulu vaya, Muneekuni na mooro; Muluku aahetta n'awo, elapo ya vathi; vano etthu ekina yaarowa wiiraneya. Yookhala etthu ehanle wiiraneya.

. . .awo othene yaari nipuro nimosa, ni mwiiwanano mmosa.

Naanaanoru waahiiwanyeya okhuma osulu oruma . . . ephayo enoopa n'ikuru, yaasanrye mpa mothene mwaary'aya.

. . .malumi ookawanyeya . . .yaanaamorela . . .awo.

Etthu *yookawanyeya* exeenii? “Yookaweya.” Ntoko okukuma, mootoko omwiiwa mutthu akukumaka? Aniira, “ah-ah-ah, oh, ah-ah,” moone, khanwerya ohimya etthu. “Okawanyeya, okaweya.” Ntoko ettotopwa *yoothaleya*, enihimya etthu ekhanle “yoomeyeya, yoopwexeya.” Awo khayaalavulasa. Awo khayaakwakwaruwa mwaano. Awo khayiira etthu woohikhala onyakula paahi.

. . .malumi ookawanyeya yaahaamorela, ntoko wira waari mooro. (Oh, awo khayaawerya wiikhupaara!)

Vano othene aya yaahisareya Eroho Yowarya, . . .
(Whish!)

⁹⁸ Vano exeeni yiiraneiyeye? Awo yaahikhumelasa mphironi. “Ori vayi Rabbi ule Jones? Ori vayi mulopwan'ole? Ni ori vayi mulipaoththokelela ole muulupale?”

“Muluku aari vasulu vahu, ni Moise, vamwiiwani waavarela; Owo aahinilyiha emana, okhuma Osulu. Owo oheetta ni hiyo iyaakha tthaaru ni thanu na mosa . . .iyaakha tthaaru ni miyeeri mithanu na mosa, elapo ya vathi vaava. Masi vano Owo ori mwa miyo. Nkihiyo miyo kinlavula; ti Yoowo. Kinnisuwela wira Owo ti Pani, ni kinnisuwela miyo k'ani. Nkihiyo-tho miyo; Owo ookhala.”

Munwelihe va! *Nyuwo atthu a* Isarayeli, *ni . . . nyuwo* munkhala oYuteya, *musuweleke—musuweleke* ela, *mwiuwelele* nsu naka, nyuwo alaleyi othene ni marabbi.

Whish! Wulu! Owerya wo olavula! Oh! “Ala khahapalasiwe!” Owaakiheryaka ale ooyevexa, imiya piili ni miloko miili, yaavirikanyaka ale ikonto muloko wala oovikana.

...*ala* khahapalasiwe, *ntoko* nyuwo
sinuupuwel'anyu, *woonaka wira* iya nlelo *woora*
tthaaru sa voosiisu.

Miyo ka mulaleyi a Ehapari yooereera yoomalela. *Masi*
ela t'ile yaahimmwe *ni profeta Yoweli*;

...*enimwiiraneya mahiku ookiserya, onihimya*
Muluku, miyo kinimwaamwarexela...Eroho aka
 (Whish) *atthu othene: nto awinyu... Nyuwo* moomoona
 Maria ainaka mwa Eroho, alavulaka ilavulelo ni airaka
 siiso?...*atthu othene:...*

...*ni* arumeyi *aka kinimwaamwaraxela...Eroho*
aka;...

[Munna Branham onooa ikuphi imaara tthaaru—Mol.]

...Kinimooniherya ithoonyeryo wirimu *osulu, ni...*
elapo ya vathi;...malumi a *mooro, ni otthuwa wa*
mwiixi:

Muluku aari mw'atthu Awe okathi uwo. Amen.

“Ahe, vano, ekharawu xeeni murin'anyu? Vayi, exikola xeeni
 munikhum'anyu?”

⁹⁹ “Eyo khena maana naanaano va.” Oh, owo khupacerya
 ohimya Soolempwa.

(David aahimoona Owo khalayi ene!)...*Apwiya*
okathi p'ukathi ohoolo waka...nkinoova etthu:

...*tivo murim'aka* wootteeliwa, *okhala wira...ni*
nlumi naka nootthapa;

...*awo khanihiya munep'aka mookhwaani, nnakhala*
khanihiya erutthu ya Oowaarya aya yinttaka.

...*kinthuna wooleelani oratta-ene mwaha wa*
*tiith'ihu David,...**yoowo okhwiye khuvithiwa, nave*
mahiye awe aakhala...mpakha olelo.

Masi ary'ene profeta...owo aahoona khalayi ene orwa wa
 Naxariya.

...*nto musuweleke, wira Muluku oomukhalih*
Yesu yoola, nyuwo mmukhomenly'anyu ni matat'anyu
ootakhala, Pwiya ni Kristu. (Amen!)

¹⁰⁰ “Alopwana n'axinna, niireke exeeni wira noopowe?”

...*khwira, Murukunxe murima, khula mmosa a*
nyuwo, mpatisiwe mu nsina na Yesu Kristu wira
muleveleliwe itampi sanyu, nto munimwaakhela
yovaha ya Eroho Yowarya.

Tthiri natiri t'awinyu, ni awaya an'inyu, awaya ale
ankhala ottaiwene, othene ale Apwiya Muluku ahu
antthu'aya owiihana. (Amen.)

101 Vaakhalakaru wira Muluku ookhalana atthu, Muluku ookhalana Ekereja, Muluku ookhalana Eroho Yowarya eneetta ni Yeeyo. Ti yeeyo Muluku ovahenry'awe Eroho Yowarya. Alipa-ootthokelela anookhumelela; kweekwe annikhala. Masi Muluku ookhalana ale vakhani nipuro nlo. Muluku ookhalana Ekereja emosa yaamukhaani enrowa okelelaka ohoolo n'upatiiso wa Eroho Yowarya, wira elaleeryeke Waarya. Ni awo anrowa okhala ale, mwaha w'onamoona aya, anrowa olamula olumwenku.

Bibilia khohimye wira Yesu oohimya, "Ooreeriwa t'ale ooreera murima; awo anoomoona Muluku"? Ni Owo khonihimya, wira, "Anaxariya, atthu oowaarya, animwaalamula atthu a mulaponi"? [Muthukumano oniira, "Amen."—Mol.] Khweli.

Onamoona anyu olelo onooruaha olamuliwa wa muttethe ola. Onamoona ahu wa opatiiso wa Eroho Yowarya ni Owerya wa Muluku, makhalelo ooreera, sinooruha olamuliwa wa muttethe ola. Okathi ela . . .

102 "Oopacerya anookhala ookiserya; ookiserya anookhala oopacerya." Nkinrowa osuwela etthu ya Sankey ni Moody, woohihimuwani waya. Awo khanrowa osuwela etthu ya miyo, mwa yeela. Masi kinrowa weemererya yeela, wira kikhalele onamoona; nave-tho nyuwo.

Nto mwa yeeyo, mwaha woomwarya Waarya wanyu, ni opatiiso wa Eroho Yowarya, ni mwaha wa makhalelo mwaatthar'anyu, ni itthu Muluku iiraly'awe wira alipiherye wira Owo oneetta vaava; nto ni otthokelela waya, awo aroohiya Eyo; awo anrowa olamuliwa ni masantu. Awo aalamuliwa. Awo aavira-mo. Oh, wulu!

103 Kaalavula mwaha wa Owerya wa mavekelo, Owerya wa olavula, Owerya wa makhalelo ooreera. Amen. Ti yeeyo Eroho Yowarya ery'aya wira yiire.

104 Akina wa nyuwo atthu muneetta iwo, mwiiraka, "Ahe, nkinwerya ohiya owurya. Nkinwerya ohiya *ela*."

Eroho Yowarya enrweela okhala mwa nyuwo, wira ekhalihe *nkinwerya* iya sothene okhuma mwa nyuwo. Ti yeeyo. Waahiiha athiyana omettha maihi aya, waahiiha waawara akaputtula ni ikalsa. Khanivo ntthyawelo. Waahiiha okwakwaruwa mwaano. Oh, ayo, mwaha wa yeeyo Eyo ekhanly'aya, wookhalihani nyuwo makhalelo ooreera. Miyo kinoothara miixuttiho sa Bibilia khula okathi.

105 Muthiyana mmosa iirale, "Khivanreere oviha; kihaana owara seiya paahi. Enikiwereiha muru kahiya vale maihi aka wunnuwa."

Masi khanivo ntthyawelo ni Eroho Yowarya. Eyo eri vo wira yiireke siiso. Eyo enoothara Masu oratta-ene. Ti yeeyo Eroho Yowarya ery'aya wira yiire.

Eri wira yoorukunxihekeni muru nyuwo mulopwana w'athiyana awo nuusu woohiwara etthu, ni ohiya waakhalela ithaama, ni atthu a mukereja. Ti yeeyo Eyo ery'aya wira yiire.

¹⁰⁶ Eri wira yoohiiheni onvura sikaro ni owurya, khukhala. . . otthuna okhala mutthu muulupale. Eyo enookumiha eyo mwa nyuwo. Eyo enimooyevihani mwairaka yeeyo. Ti yeeyo Eroho Yowarya ekhalenly'aya. Ti ya makhalelo ooreera. Ti yeeyo. Woohiihani owaapa atthu. Woohiihani ottikha iturufu, omuttikha muxuwa, ni itthu iya sothene muniir'anyu vanlothoni.

Eyo enimoohiihani wira ntoko siniir'anyu, okhala oohiroromeleya n'amwaar'inyu. Ti yeeyo Eyo enrowaaya wira. Ti yeeyo. Eyo enimoohiihani nyuwo otthuna omuthela mwaara a mutthu mukina. Eyo ekeekhaii volikana.

Ti yeeyo Eyo ekhanly'aya. Eri wira yookhaliheni ni makhelelo ooreera. Ti yeeyo Eroho Yowarya ekhanly'aya Owerya waya, "wira muhelele ophenta wanyu itthu s'Ossulu," weiwo Muluku onkhal'awe va. . . ? . . . muupuwelo wa Kristu mwa nyuwo. Khamunwerya otthyawa wona itthu iyo; mwaweha vale, munoorukunxa muru anyu. Ti yeeyo. Ery'aya wira yookhaliheni.

¹⁰⁷ Nyuwo muniira, "Miyo nkinwerya wira. Oh, nkinwerya tu wira." Vekeekhai, *nyuwo* khamunwerya.

Masi Eroho Yowarya erwenle yeeyo. Ti yeeyo Eyo erwenly'aya. Eyo erwenle okumiha yeeyo mwa nyuwo, mihapo iye sothene sa khalayi ni itthu siniir'anyu.

Wuulumela iwo ottuli, mwiivalaanihaka, mwiiraka, "Attottopeliwe Muluku, miyo ka Mmetotista, nkinrowa okhala nnaata ni masantu ale oophirikeya." Eroho Yowarya erwenle okumiha yeeyo mwa nyuwo.

¹⁰⁸ "Miyo ka muPatista. Miyo ka muPrespiteriyano. Nkaakhanle orowaka nikhuru nle naamukhaani na msantu oophirikeya." Eroho Yowarya erwenle okumiha okhaleleya iwo wothene mwa nyuwo. Ti yeeyo Eyo erwenly'aya. Eyo enimoorapihani Mphomeni; owookololani. Ti yeeyo Eyo erwenly'aya wira.

Eyo erwenle owookolelani. Owo ohimnye wira "Mapuro oothipakaseya yookoleliwe." Ti yeeyo Eyo erwenly'aya wira; wookolela yeeyo. "Mapuro othene oosulu waapatthiwa; okhaliha myaako sothene wooneya ntoko wira sothene sinimwiina ntoko amwaapwittipwitthi, ni makukhu othene aniwoopelani ikuphi, nyuwo." [Munna Branham ohoopa ikuphi imaara xexe—Mol.] Axipalame wiipa vovirikana. Isiinu sa otthapa oruma. Khanivo ntthyawelo. Ti yeeyo Eyo erwenly'aya wira. Ti yeeyo Muluku otthunenly'awe oveleliha Eroho Yowarya, wira nyuwo mwiireke itthu iya, wira nvareke muteko. . . mweetteke mmuttharaka Yoowo.

109 Vano nkinthuna woonanarihani, masi kihooleelani wira kiri va ni exariya vooxiixerya. Wira kihooviruxeni, imaara kamosa-kamosa kinnitupha eliinya emosa nipuro nlo; ni kinkhala ni Ekeekhai, masi kinkhala vaavo ni wooniherya mwa enamuna emosa ehinrowaaya wooviruxani vanci-ene.

110 Masi kintthuna kooleeleni etthu emosa. Vakhala wira Bibilia onihimya wira ti yoonanara muthiyana omettha maihi awe, nave munahimya wira mookhalana Eroho Yowarya vano nto khunamettha maihi anyu, kinniikoha vakhala wira mookhalana. Muhinanariwe; mwananariwa vale, eyo nlelo enooniherya wira nookhala nlepa nikina noovirikana ni nyuwo.

111 Vakhala wira Bibilia onihimya wira ti yoonanara muthiyana owara ekuwo ekhanle ya mulopwana, vano nyuwo munaawara amakakawu ala ni ikalsa mphironi nno, nyuwo athiyana munnunwe! Kinoona wira mwaana mwaamukhaani yaamukhala saa...etthu, okhala wira awo anthweelasa n'aximiravo axikhaani ni itthu siiso. Masi, nwehe, okathi nyuwo—okathi nyuwo axithiyana munnunwe, a iyaakha, muloko ni thanu, muloko ni thanu na mosa, muloko ni thanu na tthaaruu, mpakha apiipi, weettasa nno mphironi! Ni Bibilia ohimmye wira, “Ti yoothanyeya vamaithoni va Muluku,” muthiyana owara itthu iya. Nto nyuwo munawara, khula enamuna, ni wira mookhalana Eroho Yowarya? Kinnitikinihiwa imaara sikina. Eroho Yowarya enrowa otthara Masu a Muluku oratta-ene.

Nto mulaleyi ottuli w'epulpitu, ohirina mahala oophiyerya olaleya Yeeyo, kinnihoverya wira ookhalana Yeeyo. Eyo ekeekhai voolikana! Ahe, ti yeeyo Eroho Yowarya ekhalenly'aya.

112 Eri wira emuttikitthele mulaleyi. Eri wira evahe waarya nikhuru. Eri wira ekhalihe Ekereja oratta-ene. Eri wira eruuhe wiiraana wa Eroho. Eri wira eniiraanihe vamosa ni Owerya. Eri wira eniiraanihe vamosa n'uphenta, ophentana w'axinna.

Nkincala vakhala wira mwa Mmetotista, muPatista, Prespiteriyaano, Luterano, etthu p'itthu mukhanly'anyu, hiyo othene nakhala—ru oopatisiwa mwa Eroho Yowarya emosaru mw'Erutthu emosaru, khukhala mpantte wa Erutthu ya Yesu Kristu, Khiivo...Khiivo etthu ya vano, etthu y'ohoolo; etala, okhwa etala; khiivo enwerya onimwalaniha ni ophenta wa Muluku, ophenta wa Kristu, “ophenta wa Muluku ori mwa Kristu,” okhala wira nooyariwa ni Eroho Awe, orapihiwa mw'Ephome Awe. Hiyo na soopattuxiwa isya. Ti yeeyo Muluku aarwenly'awe wira. Ti yeeyo Eroho Yowarya ekhalenly'aya. Ayo, mulopwana. Ti yeeyo.

113 Vano, atthu, mukiwehe, wiitho. Matata manci-ene aavenxiwa, wira mwaahikhalana Eroho Yowarya; moone, vekeekhai, yaahikhala. Oh, vano ki—kinrowa otupha vakhani paahi va. Ela enookaravariwa. Masi ninrowa woonaxa vanci-ene meelo ohiyu.

Mwaahimyaka wira mookhalana Yeeyo, vano munakhala oottheka wa itthu iya, kinniikoha wira exeeni enoohoolalani. Muluku khonrowa woohoolalani ota wa Masu. Owo onrowa wookhalihani ni Masu, okhala wira iyo ikano sa Muluku Mwaneene, sa Ekereja Awe, w'atthu Awe, w'athiyana, ni w'alopwana.

¹¹⁴ “Ahe,” eniiriwa, “khenikihaaxa miyo wira *ela* wala *ele*.” Khenoohaaxani? Masu anihimya wira ennoohaaxani.

Ni vakhala wira Eroho Yowarya eri mwa nyuwo, Eyo enimoohoolalani yoorihakani mwa Masu. Khasinrowa okhala mitthyawelo. Muluku khompaka mirukunxelo wala sootthyawela. Owo onhela nlepa vano nyuwo muhaana otthara. Ti yeeyo tu. Ti yeeyo ery'aya ni khula mutthu. Nyuwo munoorwa enamuna emosaru.

¹¹⁵ Petru oohimya, “Murukunxe murima, khula mmosa a nyuwo; mpatisiwe, khula mmosa a nyuwo, mu Nsina na Yesu Kristu wira nleveliwe itampi sanyu, vano munimwaakhela yoovaha ya Eroho Yowarya.” Munnona? Ti yeeyo. Nihaana ophiyerya mukaan'owo.

¹¹⁶ Vano nkinthuna woonanarihani; nkinreere woophentani. Masi, munna mulopwana, muthiyana, moosuwela wira, ni... wira koosuwela wira kihaana weemela mahiku ookiserya woohihimuwani, ni nloko nla n'atthu, kaakhule mwaha wa Masu ala? Ni Eroho Yowarya yooniheryaka yeela, ni miyo kilaleeryaka Yeeyo iwe, munrowa weemela vayi? Munrowa otthyawa sayi yeela? Khamunrowa owerya, mpatthani. Muhi. Vano muhiye wira yeeyo. Sothene siniir'anyu sikhlanle soonanara, muhiye.

Nyuwo muniira, “Miyo nkinwerya.”

Weso nyuwo khamurina ole Namawerya mwa nyuwo nlelo. Eroho Yowarya yarwa vale, Eyo enoovahani Owerya vasulu v'olumwenku. Nto nyuwo mwa...Mwiiwe etthu Owo ohimaly'awe. “Mwaapentaka olumwenku wala itthu sa molumwenkuni, okhala wira ophenta wa Muluku khokhanle mwa nyuwo.” Vano, khanivo ntthyawelo. Owo onikhaliha orattane, nto hiyo nihaana ophiyerya nlepa nenlo.

¹¹⁷ Koosuwela wira munuupuwela wira kinootepana. Masi miyo kirootepana osareya naanaano va. Munnona? Nwiriyan. Eyo ekeekhaii. Vano mphwanye Yeeyo, munna mulopwana, muthiyana.

¹¹⁸ Muhihiye ikoleexiyu kamosa-kamosa iya s'otthokelela wooleelani, “Oh, iyo itthu sa khalayi.”

Vakhala wira Eyo itthu sa khalayi, weso Muluku t'a khalayi. Nto vakhala wira Muluku t'a khalayi, weso miyo ti siiso, nave. Amen. Kintthuna kikhale ntoko Yoowo. Mwaha wa xeeni? Eroho Awe eri mwa miyo, enivoliwa etala ni ntthona, enihana itthu sothene soovirikana ni Masu... .

119 Atthu yaahimyaka wira, “Khiva mulattu, oh, mulopwana ottikha iturufu vakhani wira arukuneye, ni weexa musurukhu mmosa wala miili. Ti vooreera.” Muluku onihimya wira kehiyo.

120 “Oh, nyuwo mwawurya-ru vooreera v’opatthani paahi, n’uhapaliwa vakhani paahi, imaara kamosa-kamosa.”

Masi Muluku ohimnye wira, “Ootakhaliwa ole.”

121 “Oh,” nyuwo muniira, “khiva mulattu, Munna Branham. Miyo—miyo—miyo kinnimettha maihi aka mwaha w’etthu y’ekeekhai. Muthiyana, moosuwela, athiyana akina anniira.” Miyo khenikicala etthu aniira athiyana akina. Awo kahiyo ethooneryo anyu wala anoorumani. Mwakhalana Eroho Yowarya mwa nyuwo, munootthara miixuttiho Saya voochicala etthu atthu anoohimyan’ayani.

122 “Ahe, Munna Branham, khivanreere oviha, nto kihaana owara ikuwo *khata khata* iya.” Omooroni ti wooviha ovikana iyo, munn’aka oophentiwa. Mukihiye kooleeleni yeeyo. Nto—nto muhiire. Muupuwele yeeyo.

123 Nto Eroho Yowarya khula okathi enooweetiheryani w’Ekeekhai, ni Ekeekhai Aya ti Masu. “Masu Aka ti Ekeekhai. Masu othene a mutthu t’owootha, masi Awaka t’ekeekhai.”

Nto muupuwele paahi, “yoothanyeya.” Mwaamuwerya wuupuwela?

124 Nla nuulumo nimosa nootepa woopiha murumeyi ohimya, masi kootoko ovolowa ixooro sa mapuro weiwo yaarowaaya paahi. . . Mwaarow’anyu ohalela orukunuwa, khikhuma, yaari paahi yo. . . N’itthu soonanarasa vaxirini. Miyo kaanuupuwela, “Anwerya sayi atthu okhala oohifayi siisa?” Ni wunkha! Nto kaavolowaka mapuro awo, kweekwe kaanuupuwela, “Wunkha xeeni!” Kaani. . . Mpaani, kaaniphura ephula aka so, wira kinyawe. Kaanoova wira okathi waavar’aka muresa wa mukhora, tho, wira yaamukhala axiitthu a ikisonono ni itthu siiso. Nto kaanuupuwela, “Oh!”

125 Nihiku nimosa, keemenle-ene ommorela matteeke, kaahivolowa nimosa wa mapuro yaawo, ahiiso ostasawu w’oxipooroni, kaahivolowa memmo. Nto kuupuwela, “Oh, ikharari.”

126 Nto Etthu emosa khukiirela, “Ti siiso olumwenku onimunkhery’aya Muluku. Ti woothanyeya.”

127 Miyo kuupuwela, kaamoonaka muthiyana eetteka mphironi, iiseettihaka siiso, owanre-ene ikuwo sa mulopwana, ti siiso sinooneyaawe wa Muluku. Onkhala oothanyeya, etthu ekhanle yoonanara ni yo wunkha, ohoolo wa Muluku. Nnakhala vo, owo onoorowa okereja Ttiminku, oiphwanelinhe-ene.

Iwe onoorowa mulopwana, onwurya, oniiya, ni onimusivela musurukhu, ni onimwiierya namwaattamanani awe, ni itthu sothene sikina, wira aphwanye musurukhu mukina vakhani; ni

wira itthu iya, ni omweetta cuuku, ni onvura sikaro, ni owurya, ni wootha; vano nto n'urowa okereja ni ohimya onamoona. Othanyeya! Enanarelo! Eyo ti ekereja ya otthokelela.

¹²⁸ Aniira, “Ahe, kiniira mpantte wa ekereja.” Ayo, ahaana ohiiwa okhuma mukereja, minuutu muloko ni mithanu, wira matiyakono othene ni othene aya ewerye onvura sikaro, ni pastore, nave, ehinatthi otthikela olompa mukereja. Mukileele! Mwiivalaanihe ni khula etthu yoonanara!

¹²⁹ “Munanarihe erutthu; Miyo kinoopwetexa.” Muluku ohimye wira aamwiira. Ni olelo, mwaha wa kankuru, onnikumiherya ipursentu miloko mithanu na mixexe n'itthu sa okhwa, kankuru a vammilo ni masasu, ontannyiwa mwaha wo waavura asikaro. “Munanarihe erutthu; Miyo kinoopwetexa.” Masi awo aneetee erowaka omooroni, ephirikeyaka siiso, awo khansuwela.

Vano mulaleyi mmosa oneemela vapulpitu a ikharawu xexe, okhumme okolexiyu, oninvura sikaro, yoowo. Mukihiye kooleleni etthu emosa, munna. Eroho Yowarya eveleeliwe wira ewiihane alopwana n'athiyana yaakumihaka mw'etthu iyo. Mwiivalaanihe!

Nuulumo *ekereja* nnihimya “ovalaaaniwa.” “Mukhume eriyari aya,” onihimya Bibilia. “Muhikwannye itthu saya soonanara, nave Miyo kinoowaakhelani; nto nyuwo munookhala an'aka axilopwana ni an'aka axithiyana wa Miyo, vano Miyo kinookhala Muluku anyu.” Oh, wulu! Nkintthuna okhala ootakhala, masi kintthuna kikhale naxariya ni okhala oororomeleya. Ayo, mulopwana. Oh, etthu xeeni yootakhalexa!

¹³⁰ Alopwana n'athiyana, nimphwanyaneya vayi olelo? Niri vayi? Nrowe neemele.

¹³¹ Ohiyu uwo, kimmathale-ene vakhaterani emosa ya khalayi musaala, (nto kihaana omaliha), ekhatera emosa yaakhuneya ya khalayi. Numala ovekela mahiku mararau wala maxexe, kaahiphierya nipuro nimosaa, kaarowaaka, ni wuupuwela, “O Muluku,” ni kaahiphierya nipuro mpakha kahaasuwel'aka etthu yo wira. Miyo khwira, “Muluku, hiyo niri woomalelani w'ephiro. Ni kinnisuwela wira kinnikhalaka oohicaliwa. Kinnikhalanaka a telefooni wira kiwaakhule, nave n'ukhala ookhulumuwa, kuhuira.” Kaahoonaa nto ntoko kaaniwerya oomoonaa Pwiya aka oveveleyaka iwe mw'epiphini, okathi Owo aary'awe ookhulumuwa saana ni khaawerya ottukhula nnawu nimosaa numala nikina, masi Owo khaakhalanxe... Aaheemela mwaha wa muthiyan'ole a oNayini, mwaha wa mmirav'ole aaruuhiwe aakhwiye; mpakha Owo aahiwerya orowa khukwannya ecanaisa, khurumeela ikuru vakhani saari mwa Yoowo wira amuhihimuxe mmirav'owo. “Ahe, kikhlanle sayi ookhulumuwa? Exeeni enikiira, Pwiya? Va miyo kinimuupuwela, 'Ahe, kinimuuluwala. Nki—nkinwerya wira.”

¹³² Aahikhala Moise, Muluku mmosaru yoowo kinimurumeel'aka, eemenle iwe, ni iyaakha imiya piili ni miloko miili.

Aahikhala Kalebi, eemenle iwe ni iyaakha miloko mithanu na mixexe, ni xoowa mmatatani mwawe, khwira, "Yoxuwa oomuhela xoowa ola mmatatani mwaka, soovira iyaakha miloko mixexe." Owo aarina miloko mithanu na miraru okathi uwo. Khwira, "Ka mutthu a ikuru olelo ntoko saary'aka okathi ule." Amen.

Miyo khwira, "Muluku, mukimorele ikharari."

¹³³ Miyo khwira, "Ahe, nkawehani va, miyo kweekwe. . ." Nto khwaavarela amwaar'aka (ottuli iwe) ntata, vasulu va Bibilia ola ni Bibilia aya mwaamukhaani, nto miyo khwira, "Oophentiwa, kinnikhalaka ookhootteyaxa. Eroho Yowarya ennikipwapwela mwa miyo." Miyo khwira, "Kinuupuwela ikhopa iye iwe. Kinimuupuwela Hattie Wright weiwe, n'aximiravo. Kinuupuwela ethu Muluku iiraly'awe, ooniheryaka wira Owo Mulukuu, onwerya opattuxa." Aleluya!

Miyo kuupuwela, "Owo ookileela eyo, soovira iyaakha, 'Miyo nkinoohiyani. Miyo nkinoonyanyalani. Khaavo onrowa okhala ohoolo wanyu, mahiku othene a ekumi anyu. Miyo kinookhala ni nyuwo. Nto mwa ntata nenla na olamula sa mmurimani, enookhala wira munrowa osuwelaka isiiri sa mmurimani. Numala, enrowa owelaka ewelaka.' Nuvira eyaakha emosa, khooniheriwa voolikana, mulaponi mothene. Va enoorwa t'ila, mutek'ola mukina muulupale, muulupalexa ovikana owo."

Miyo khwira, "Oophentiwa, kinvara ntata nanyu. Ni mukhaliheryo wa Muluku ni mahala a Muluku, mukihihye-tho kikhalaka ookhootteya-tho. Mukihye kikhume va kirowaka muhahalalih'ola wira kilaleerye ntoko kihinatoko aka khalayi. Mukihye kirowe va, kipacerye wiireeriha, ni waapakela ephiro athu; wira itampi saka yoomi, ohicaliwa waka yoomi sikhale vathi v'Ephome, ni ocompa waka okhale vathi v'Ephome, wira kiwerye okhuma ni wira, 'Mukitthare, athu.'" Ti yeeyo.

Okinanara omoona mutthu wira, "Rowakani mwiire." Onikisivela omoona mutthu onrowa okeettiherya ephiro wira kiire. Ayo, mulopwana.

¹³⁴ Nno woohikhala khalayi, naahikhalana mooro mmuttettheni nno, Pfau Oil Company yaaroopatta. Ni Nikhuru n'Anamattipiha mooro a oJeffersonville naari weiwe. Vano mpatthani aka mmosa, mutthu ooreera murima, khaalimalenle mooro muulupale ntoko ole, owo aamweetta vale, airaka, "Muyeeherye maasi vakhani nno, amiravo. Muyeeherye maasi vakhani nno."

Va khurwa ale a muttetthe mukhaani wa Clarksville, "din, din, din, din," ethhimakelaka weiwe. Nto owo khwira, mukhulupale a anamattipiha mooro khutupha, khwira,

“Muyeeherye maasi vakhani *nno*. Mmane ecanela ela *nno*. Muyeeherye maasi vakhani *nno*.”

¹³⁵ Masi epantte ekina ya muro khurwa anamattipiha yaakhuma oLouisville. Exikatta ele yuulupale ya nankura nlelo yiira eheemenle nave mukhulupale aari wookiseryani wa exikatta. Okathi exikatta eronw’aya osulu, owo aari waamuru. Khuriha epaso awe ohinatthi ophiya iwe, khupwexa ecanela, khwira, “Mukitthare, amiravo!” Ti yeeyo. Mooro waahittipha muhina mwa minuutu vakhani.

Kahi, “Muyeeherye maasi vakhani *nno*. Muyeeherye maasi vakhani *iwe*.” Ennuupuweliha, amosa-amosa w’alaleyi ala ootthokelela.

¹³⁶ Mukitthare! Nrowe! Koosuwela wira Eyo Ekeekhaii. Miyo koolawiha kihoona. Ovuwa! Eroho Yowarya ti yoolikana. Muluku t’oreera murima. Muhehererye *nno*, mweehererye *iwe*; nrowe nikele mwa Yoowo! Owo ori *nno*. Eyo ti ya nyuwo. Muluku oovaha Owerya Wawe Ekereja Awe. Kahi ottipiha *ela* *nno*, ni ottipiha; khamunkhalakhala mphwanyaka etthu. Muhoolele! Amen. Uh! Whish!

Khamunwerya-tho woona mwa yaawo. [Munna Branham onrula ilumeta sawe s’osoma-no—Mol.]

¹³⁷ Amen! Ninrowa wira exeeni? Khula mutthu okilanthi va t’osareya etthu.

Vano kinrowa omaliha; khino kihaana, numala yeeyo.

Nyuwo moosareya etthu. Khamukhanle okilaathiki vo muhisareiye etthu. Muhaana ekumi mwa nyuwo. Ekumi iyo enniweettihani, ni ekumi iyo eneettihiwa ni erooho.

Vano, nyuwo pooti osareya olumwenku, mphentaka olumwenku wala itthu sa molumwenkuni. Muluku oomoreleni ikharari.

Nyuwo pooti osareya iyaaminelo sa ekereja khata, mavekelo kamosa-kamosa munvekel’anyu, munuupuwela wira munrowa onvekelela mutthu okhwiye, wala—wala opaka nthoonyeryo mwa nyuwo. Muluku oomoreleni ikharari.

¹³⁸ Nto nyuwo pooti musareiye-ene etiini, ni eyo nlelo ti yootepa. Eyo ekeekhaii. Eyo ekeekhaii. Bibilia ohimye wira, “Mahiku ookiserya atthu anrowa okhalaxa anatiini, yooneyaka ntoko atthu oothunku; yooneyaka ntoko oothunku, masi ekhoottaka Owerya waya nave: awo muheettaneke.”

Nyuwo mwakhala oosareya etiini, mootakhaliwa; etiini paahi, ti yeeyo tu. Nyuwo mwasareya iyaaminelo, khamunsuwela enihimy’anyu. Nyuwo mwasareya olumwenku, khamunoona.

¹³⁹ Vano nto, emaara ekina, nyuwo pooti osareya Eroho Yowarya. Amen. Kinroromela wira mookhala. Ni, mwaahikhale,

kinroromela wira munoosareya. Nto mwakhala oosareya Eroho Yowarya, murina exeeni? Murina Owerya. Murina ophenta. Murina murettele. “Kinoovahani murettele Aka; kahi ntoko olumwenku, Miyo kinnoovahani.” Murina murettele. Mootthittiwa ekanyeryo. Mookhalana ethoonyeryo. Amen. Munkhalana omumula. Munkhalana ohakalala woohilavuleya, ni osareya ovuwa. Nyuwo munkhala ootthukiwa nankura. Oh, wulu! Ti yeeyo munkhal’anyu, ni Eroho Yowarya. Munkhalana...Mwakhalaru oosareya Eroho Yowarya, “Moovira mookhwaani khuphwanya Ekumi,” nwehereryaka ohihimuwa nihiku nookiserya.

¹⁴⁰ Mwa olumwenku onrwa, mwa Pwiy’ahu Yesu Kristu, n’ule omoonale Owo arwaaka moovuwani ni eyuulupale, “Ephareya enimwaahokoloxa ale akhwiye.” “Irutthu soohononeya s’ale arumpe mwa Yoowo sino. . .”

“Arumpe mwa Yoowo.” Munkela sayi mwa Yoowo? “Mwa Eroho emosaru hiyo othene noopatishiwa mw’Erutthu emosaru.”

“Irutthu soohononeya s’ale arumpe mwa Yoowo sinrowa otatuxiwa sikhalihiwe ntoko erutthu Awe Yoowo yoovuwa, mwa yeeyo Owo onwery’awe wiiweleliha itthu sothene wa Yoowo.”

“Kaahiiwa nsu nikhumaka Wirimu,” niirale Yohani, “naakihimenrye, ‘Mulepe, “Ooreeriwa t’ale ankhwa mwa Apwiya. . .”” Munrowa okela sayi? “Mwa Eroho emosaru hiyo noopatishiwa mw’Erutthu emosaru.” [Munna Branham ommana ikuphi emaara emosa—Mol.] ““. . . ankhwa mw’Apwiya okhuma vano mpakha ohoolo; maana awo annimumula miteko saya; ni miteko saya sinnaatthara.”” Hum!

Ti yeeyo Owo ovelelihenry’awe Eroho Yowarya. Oh, nrromelo woottotopeliwa, Yesu t’awaka! Kiri mwa Yoowo, ni Owo ori mwa miyo; Atithi mwa Yoowo, ni Owo mw’Atithi; ni Atithi mwa miyo, ni miyo mwa Yaawo.

Yesu t’awaka!

Oh, opuha xeeni w’eMuluku!

Miyo ka murithi a woopowa, oothummwa a
Muluku,

Ooyariwa ni Eroho Awe, varapihiwaaka ni
Ephome Awe.

Amen. Nkaakhanle orukunxaka. Oh, wulu!

Arupi othene ni maluku oowaarya, ni eparatha
ni eweero,

Macucu Awe t’osarya, Owo ookhalana
mihakhu soohaalikeleya.

Maana ka mwaana a Mwene!

Miyo ka mwaana a Mwene!

Ni Yesu Moopoli aka,

Onnikikhaliha mwaana a Mwene!

141 Amen ni amen. Nkaakhanle orukunxaka. Nkaakhanle orukunxaka. Kihaana piili wala tthaaru Soolem- . . .

Vano, va yookhala Yoolempwa ekina. Okathi—okathi munkhal’anyu oosareya Eroho Yowarya, iyo t’itthu sinkhalan’anyu. Vano nyuwo mw’ani, wa olumwenku? Mmalapo. Koozuwela wira vahooxa, masi khunaxeeke mwaha wa yeela. [Munna Branham ommana ikuphi sawe emaara emosa—Mol.] Mmalapo! Oh!

Hiyo n’anawetta ni amalapo nno,
Hiyo nimphavela muttethe onoorwa,
Ekalawa yo woopola ennoorwa naanaano,
Wira aathukumanye Atthu Awe oorika aaroihe
Owaani.

142 Kinniwerya wiiwa oruma wa maasi epantte ekina ya Muro Ohio, okathi waary’aka mwammiravo mmosa mulaleyi, kirinane iyaakha soophiyaka miloko miili ni piili, kiipaka yeeyo weiwe. Nto kaahiiwa, kiweha vasulu vaka, kiiwa Nsu, niirale, “Nwehe osulu.” Va khurwa Waarya iwe wuulupale wiithomeiye-ene vasulu vale, khukikhuruwela, khwira, “Ntoko Yohani Mpatisa aarummwaly’awe wira ahoolele Orwa woopacerya wa Kristu, nyuwo munookhalana Mutthaka mmosa onrowa ohoolele Orwa wa nenli wa Krsitu.”

Oh, kaarowa oweriya sayi waamini? Masi vahiiraneya voolikana-ene. Nto ohiy’ula myooro sa muhakalaliho sinoovarela nno ni nno mulaponi. Ekereja yuulupale ya Muluku yo woopoliwa ehiivenxa Mmansaya nipuro nlo, ni ikampaanya sulupale sa miteko s’ovoniha, ni ithoonyeryo, ni miiriirya, sooniheryaka Orwa.

143 Nyuwo mwa muletto, ni mwa mmalapo. Nyuwo muniira itthu sootikiniha, soovirikana ni itthu siirak’anyu. Khamuniira ntoko siirak’anyu. Atthu. . . Eroho Yowarya, Eyo yarwa mwa nyuwo, nyuwo munkhala oosareya Eroho Yowarya, munoothanya itthu sa molumwenkuni. Munoothanya itthu saarowa woonyoonyihani. Nyuwo munoothanya. Vano munkhala mutthu o—owiira itthu sootikiniha, nrattha noonanara, w’awo, xawawe mwaamukhaani uurameliwe vathi v’epuru ya mwalyakhu; ole kilalenry’aka, *Nto Okathi Xawawe Onitanny’awe Epuru Awe*. Nyuwo mwa mutthu otheiha omuweha, wa awo.

Masi, oh, wulu, muneetta murowaka Ephiro ya Mwene! Amen. Oh, eyo Ephiro enrowa Wirimu. Nto miyo kineetta kirowaka Ephiro ya Mwene.

Eniiriwa, “Nkanweheni santu-oophirikeya ole, nrattha nle noonanara. Eyo ti wi mulaleyi ule santu oophirikeya.”

144 Mulaleyi mmosa Mmetotista oosuweliwa aahimwiirela mulopwana mmosa olelo, oLouisville, khwira, “Kaatthuna kimukhaliherye Munna Billy, masi moosuwela enrow’aka wira?”

Kaahaana oleva muru aka mwaha wa yoowo.” Khamurina oleva muru anyu mwaha wa miyo.

Ovo ooleva ekumi Awe mwaha wa miyo. Amen!...?... Weetta murowaka Ephiro ya Mwene paahi, ti yeeyo tu. Oh, wulu! Oosareya Eroho Awe! Ooyariwa ni Eroho Awe! Oorapihiwa ni Ephome Awe! Aleluya! Oohakalala!

¹⁴⁵ Nto vo etthu ekina, vano, exeeni eniwiiriha-ni wira yeeyo? Nyuwo nlelo mwa mutthu, masi exeeni eniwiiriha-ni wira yeeyo? Okhala wira nyuwo murwiiye, nyuwo, Eroho anyu ekhumme osulu. Ti Muluku mwa nyuwo.

¹⁴⁶ Okathi waarowaly’aka oRooma, kaahiweha wira awo, khula mmosa, aarina erooho y’oRooma. Okathi waarowaly’aka oKresiya, othene aya yaarina erooho y’Ekreku. Khurowa oInklatera; othene aya yaarina erooho y’Enkelesi. Mwaarowaka mapuro, munoophwanya... Vano munoophwanya erooho ya wAmerika; eyo ti yootakhalex.

¹⁴⁷ Okathi waarowaly’aka mmittuphani wa oSan Angelo oRooma, awo yaahikhalanasa nipawe iwe, “Xontte, athiyana a wAmerika, nware ikuwo, wira mwaattittimihe alipa-ookhwa.” Erooho ya wAmerika.

Nkaaweheni yaakhuruwaka mmutteekeni, ni ikuwo iye sikhani anwaras’aya, nto atthu othene animwaaweha, Nto va onoorwa Muhano Amerika. Eyo erooho ya wAmerika. Munoowerya ohimya onikhum’awe; mwaha wa soowara sawe, vano, onimukuxa mwalapwa mwaamukhaani a ephula ya manri ottuli wawe. Ti yeeyo. Oh, ayo, owo e... Owo, owo Amerika, Muhano Amerika; onrowa eettaka, moosuwela, aittikinyaka siiso. Mwaha wa xeeni? Owo orina erooho ya wAmerika. [Munna Branham ommana vapulpitu imaara thanu na mosa—Mol.] Masi Yesu oohimya, Owo aahihimya avirikanyaka yeeyo nihiku nle, Owo iirale, “Nyuwo mw’atthu a vathi. Miyo ka Osulu.”

Nto nyuwo mwakhalana Eroho ya Kristu mwa nyuwo, nyuwo mwa a Osulu, nyuwo mwa mmalapo nno.

¹⁴⁸ Masi murina mukhalelo wa nipuro mukhummm’anyu-wo. Ti yeeyo entthun’aka ohimya. muRooma mmosa onoorwa va, owo onoosuna muru awe; ni mutthu a wAlemaanya onoorwa va; a wAmerika onoorwa va. Mwaha wa xeeni? Nyuwo murina irooho sa ilapo iyo munikhum’anyu.

Ti yeeyo ennikhaliha oovirikanaxa a olumwenku. Nyuwo munikhuma Osulu. Nyuwo munooyariwa. Nyuwo mwa—nyuwo mwa nammuttettheni a Omwene mukina. Munnaamini? [Muthukumano oniira, “Amen.”—Mol.] Ti yeeyo ekhanle Eroho Yowarya, eri wira yookhaliheni nammuttettheni a Omwene wa Muluku.

¹⁴⁹ Vano, nyuwo mwaari nammuttettheni a Omwene wa Muluku, Eyo eniwiiriha-ni wira exeeni? Ntoko Muluku siniir’awe

Momweneni mw’Awe. Vano, Muluku oniira exeeni Momweneni mw’Awe? Ti owaarya, exariya, oreera muupuwelo, oreera ankhili; Owerya ni ophenta, waarowela ale oorimeela, waavoniha aretta, opaka miirlirya wira itthu suulupale. Vano, vamaithoni v’olumwenku, munooneya ntoko mulolo, ni eniiriwa, “Atthu ale aavahuwa.” Munnona? Masi nyuwo mwa nammuttettheni a Omwene.

¹⁵⁰ Yoolempwa emosa paahi, mwatthuna vale olepa, Yohani 12:24. Mukihiye koochemeeryeni naanaanoru. Yesu iirale:

...enuku ya triku yamorela vathi...khuhikhwa,
kheniruuha ekumi ekina.

Vano, nwehe, moonelo mmosa w’omaliha-no. Vano muupuwele, nto, ti vekeekhai...Vano, wa nyuwo atthu, ti yuulupalexa mara ni voophaveleya, ni vookhanyerereya ni yoowaakuveya, wira mwaakhele Eroho Yowarya naanaanu. Maana, mwaahaakhele, khamukhanle ohihimuwaka. Vano nwehe. Muluku khokhanle ohononaka ikano Sawe. Hiyo noosuwela eyo. Owo onttharihela ikano Sawe.

¹⁵¹ Vano, e—enuku ya triku, wala nakhuwo, ninookuxa, ntoko Yesu sihimaly’awe vo. Vekeekhai, na—nakhuwo, mBibiliani, miyo kaamusoma paahi olelo, enihimya eliinyu wala khula muthinto w’epyo, masi, etriku, esevaata, nakhuwo, wala etthu p’itthu, enuku. Masi enuku ya triku yamorela vathi, vano, yookhala...Othene ahu va nihoona, noosuwela wira ela enniiraneya. Epyo ya triku, wala enuku ya nakhuwo enniwerya okhala yoolikanaxa ntoko sinwery’aya, vano nyuwo khuhela vathi, vano vakhala wira enuku iyo... .

Eyo ehaana ekumi yoohikisa. Eyo enoorowa vathi olelo, ni wiima mmutathini; n’utthikela omora, n’urowa-tho osulu; n’utthikela vathi. Eyo erina ekumi yoohikisa.

Enuku iyo yaahikhalane eropo y’ekumi muhina, hata wira erenre sayi, khenkhalakhala yinnuwaka. Enoorowa vathi yintte, nto ti yeeyo. Epantte aya, itthu sowooneya, sinoowerya owareliwa muteko wira sinttihe ni itthu sikina mutthayani. Masi eyo yatthikelaru okhala ekumi, eyo khenkhala vahikhanle wira erookhalana ekumi yoohikisa mwa yeeyo. Khula mutthu onnisuwela eyo. Nyuwo khamukhanle.

¹⁵² Vanooweryaneya okhala alopwana anli, mmosa aya oolikana, oowaili aya elikanaka. Mmosa aya pooti okhala mutthu ooloka, owo onoowerya ovara miteko sooreera, onoowerya wira sikina; masi vahikhanle wira mutth’uwo ookhalana Ekumi Ehinimala mwa yoowo, owo khankhalakhala avenyaka w’ohihimuwani. Owo khonwerya; khiivo etthu vo yo onvenyiha. Khiivo etthu yo onvenyiha owo, khiivo Ekumi. Vano, moone, munn’aka oophentiwa mulopwana, muthiyana, vahikhanle wira mutthu onooyariwa vasya, owo khonwerya otthikela Momweneni mu. Owo khonwerya. “Epyo ela ya

triku yaahimorele vathi khukhwa.” Owo ihimya Mmansawe. Masi Owo aahikhalana, kahi ekumi yookhikisa, Owo aarina Ekumi Ehinimala; nto Ekumi Owo oovahaly’aweni, wira nyuwo mukhalane enamuna emosaru y’Ekumi.

¹⁵³ Vano, mwakhalana ekumi ya mutthu paahi, eniphiyerya oweetihani paahi ni wunlela itthu, “Muthiyana oniivahererya sooreera s’elapo owo ohookhwa nlelo akhalaka,” khamukhanle ohihimuwa. Nyuwo pooti okhala mwali oosuwelaxiwa oxikola. Nyuwo pooti okhala mwali oosuwelaxiwa w’ale anttikha iturufu munlokoni mwanyu. Nyuwo pooti okhala muthiyana oowarexa oratteene mulaponi mwanyu. Nyuwo pooti ooreerexa. Nyuwo pooti okhala a mukhalalo woomalela oreera. Nyuwo pooti okhala muluku eethiru w’aiy’anyu. Nyuwo pooti okhala itthu sothene iya, yeeyo, ekhanle yooreerexa. Masi, munna, vahikhanle wira muhaana Eroho Yowarya mwa nyuwo, ekhanle Ekumi Ehinimala, wookiseryani w’ephiro ela moomalamala.

Nto nkincala ntoko munoonney’anyu wala moota itthu iya siry’aya, wala mury’anyu oohisuweliwa wala oosuweliwa, moota mureeraly’anyu wala munananry’anyu; mwakhalanaru Ekumi Ehinimala, vo munookhala voohimala ni voohimala.

¹⁵⁴ Mweeri ni ittheneeri sarowa-ru, vano elapo yapwina muhina wa myaako ni ithako, ni itthu sothene sihaana—sihaana, sihikhanle; ni olumwenku oveveleyaka ntoko mutthu oohapaliwa arwaaka owaani ohiyu, ni ittheneeri sikhoottaka waarya, ni simoraka wirimu, nto mweeri onathatuwa ephome; ni nsu—nsuwa niriipelaka ni wiipithiha wiitho waya, samoona-ru Mwaana a mutthu arwaaka. Nyuwo munrowa waaryaka muxariyani mwa Yesu Kristu, wira mukhume mmahiye ntoko mwamuthiyana, ooreera, wira mmukuxe mwaapar’anyu, mukhalaseke voohimala ni voohimala, nto okathi wothene Woohimala munrowa okhalaka nlelo. Ti yeeyo ekhalenly’aya Eroho Yowarya.

Moonaru mpurulo vakhani, muhikhootte Eyo.

¹⁵⁵ Eroho Yowarya exeenii? Muluku mwa nyuwo. Eyo ti ya xeeni? Otthikela miteko Sawe eriyari y’atthu Awe; oruuha Ekereja Awe vamosa, oruuha Ekereja nipuro nihiku nla, wo waavikanaxa aLuterano, aMetotista, ni aPentekosite, nipuro voophiyerya okhalihwiwa aana ni mahala a Wokuxiwani. Eyo, okathi epantt’ila ya Ekereja, okathi Eroho eneett’aya ekelaka Ekerej’ela va, eyo enoovenya; nto enookumiherya, enimwaakumiherya ale othene oovuluxiwa akwannyale Eroho eyo.

aLuterano ale yaarisa vale ni waarya wothene awo yaarinas’aya, mwa okhalihwiwa naxariya; aMetotista ale yaamorenle vathi, ni wiittheliwa maasi wiitho waya, okathi Eroho yaakwannyaya mwa oreerihwiwa; aPentekosite ale, yaawo yeetta erowaka nno ni nno mphironi yihaniwaka “malumi ni anamalavula,” ni, oh, “anamakwakwaruwa mwaano,” ni

“nttaava na nraththa na mmuro,” ni sothene iyo; awo yaanikhala mwa exariya, vamaithoni va Muluku Nihiku nle, vekeekhai ntoko Bibilia ola simphwanyaney’awe va. Mwaakaaminiki wira ka murumeyi... Nyuwo munikiihana profeta Awe; miyo nkiniisiihana siiso. Masi nwiriyane, kinooleelani mwa Nsina n’Apwiya. Ale ari mwa Kristu Muluku onimwaaruuha ni Yoowo w’Orwaani Wawe, wohihimuwani, nto yaale paahi ari mwa Kristu.

¹⁵⁶ Ninkela sayi hiyo mwa Kristu, mw’atthu?

“Mwa eyaaminelo emosa othene ahu nnimwiitakaiha”? Nnari.

“Mwaha wo ovahana ntata ninoopuruleliwa-mo”? Nnari.

“Ni maasi mamosa hiyo othene ninoopatisiwa memmo”? Nnari.

Wala, “Mwaha wa muromolelo mmosa hiyo othene ninooromoleliwa-mo”? Nnari.

Masi, “Mwa...” aKorinto Oopacerya 12:13, “Mwa Eroho emosaru,” Eroho Yowarya, Eroho ya Muluku, “hiyo othene no...” aMetotista, aPatista, aLuterano, aPrespiteriyaano, “Nineetta Mowaaryani, ntoko Owo ory’awe Mowaaryani, nookhalana opatthana mmosa ni mukhw’awe, Ephome ya Yesu Kristu, Mwaana a Muluku, enninirapiha soottheke sahu sothene.” “Mwa Eroho emosaru hiyo othene noopatisiwa mw’Erutthu emosa, khukhalihwi wira mpantte wa mahala Awe.”

¹⁵⁷ Khamukhanle orowaka Wolamuliwani. “Ole oniwa Masu Aka ni onaamini.” Khaavo onwerya waamini mpakha okhalane Eroho Yowarya. “Ni onimwaamini Ole okirumme,” okathi Eroho Yowarya enikhalel’aya onamoona ohihimuwa Wawe. “Ookhalana Ekumi Ehinimala, khankhalakhala arwaaka molamuliwani, masi oovira mookhwaani khuphwanya Ekumi.” Exeeni? Khamunkhalakhala nviraka Molamuliwani. Khamunrowa okhala ohoolo wa Ehice Yootteela wira mulamuliwe.

Munikumana n’ulamuliwa wanyu weno. Moovira molamuliwani okathi muvinry’anyu khwira, “Nkihiyo ooloka, ni wiixutta waka kuhiyo wooloka. Pwiya, murwe mwa miyo, ni mukikuxe mukihooole, Pwiya. Khenikicala etthu xeeni olumwenku ula onihimy’aya. Mukihooole, Pwiya, ni Eroho Anyu.” Moophukiwa nto. Mwiiphuke mmansinyu ntoko mulolo mwaha wa Kristu, ni, mwa exariya Awe, Nihiku nlo hiyo ninrowa okhala oohikhwa ntoko Yoowo.

¹⁵⁸ Enamuna emosa paahi. Sayi? “Mwa Eroho emosaru hiyo othene noopatisiwa mw’Erutthu emosa.” Nto nyuwo mwakhala mw’Erutthuni memmo, ophuka woophuka Erutthu yeeyo, ni mookupaliwa mwa Yoowo ntoko elivelo ya etampi anyu.

Nyuwo muniira, “Miyo kiihira eyo, Munna Branham.”

Vano, Eroho Yowarya ehoorwa khoovahani ekanyeryo ntoko ethoonyeryo, Eroho eyo enooruuhani mw’Erutthuni ya Kristu. Munoorukunuwa ephiro ekina, mwa mutthu musya mwa Kristu Yesu. “Moovira mookhwaani khuphwanya Ekumi. Itthu sa khalayi soovira, vano nyuwo mwa musya mwa Kristu!” Amen!

¹⁵⁹ Oh, xontte, mukihye kookupaliheni, munn’aka muKristu mulopwana wala muthiyana. Muhiye muhakalalih’ola woovirani. Muhaana waakhela Eroho Yowarya. Exeeni Iyo? Eroho ya Muluku. Eyo ti ya xeeni? Wira eweettihekeni, yoohoolekeni, woosarihani, wooreerihani, ni owiihanani, mukelaka muKereja.

Exeeni ekereja, nuulumo *ekereja* nnihimya-ni? “Oowiihaneliwa okhuma, oovalanihiwa.” Oh, moota kaakhanly’aka okuxaka mutthaka mwa yeeyo naanaano va! “Oowiihaneliwa okhuma, oovalanihiwa,” aletto, oohikhala a mulaponi, anawetta ni amalapo, ehimyaka wira hiyo khanirina muttetthe vathi va ninthun’ahu okhala-mo. Oh, wulu!

¹⁶⁰ Ntoko Abrahamu, Isakhi, ni Yakope, yeetty’aya, ekhalasaka muheemani mulaponi. Awo yaanihimya wira yaari anawetta ni amalapo, osuulu wa murithi, murithi ottuli wu; tiithi, murithi. Hiyo na osuulu aya. “Ni awo yaaphavelasa Muttetthe yoowo Namateka ni Nampaka aakhanle Muluku.” Amen. Awo yaaniphavelasa.

¹⁶¹ Nto, olelo, osuulu aya nlelo omphavela Muttetthe onrwa, yiiraka, “Miyo nkinthuna wiilikanyiha ni olumwenku ula. Nkinthuna okhala nnaata n’itthu molumwenkuni mu. Kintthuna, kimpavela Muttetthe otekiwe ipantte xexe. Kimpavela Muttetthe orina Ekumi Ehinimala, weiwo nsuwa nihinrowaaya okhalakhala nitupweelaka, weiwo ohinrowaaya okhala-wo wuuluvala, weiwo ohinrowaaya okhala ekuwo yooriipa y’enaamukhweli vamukhora, wala mahiye mukerekhere wa mwaako. Kimpavela Muttetthe yoowo, Namateka ni Nampaka okhanle, Muluku.”

¹⁶² Eri enamuna emosa paahi wo ophwanya yoowo. “Naahikhala Nluku nimosa naapharuliwe vamwaako woohikhala matata, naaphirikeyenle mulaponi khunyaanyasa, nto khukhala ntoko etriku...wala malaxi okathi w’ohepha.” Muhiye Nluku nlo, Kristu Yesu; Nluku nlo nookwattula wa olumwenku, Nluku na nveeheryo, Nluku nootheiha, nluku nookwattula wa ekereja; masi nluku nooreerexa ni na Makineeti wa mulipa-oowaamini, Nluku na nrromelo, Nluku na omumula. Oh, wulu!

Kimumulaka! Koosuwela wira koovira mookhwaani khuphwanya Ekumi. Munep’aka onoomumula. Oh! “Murwe wa Miyo nyuwo othene mulemeliwe ni muhaaxiwe, Miyo kinoovaha omumula munep’anyu.” “E—ethoonyeryo emosa

enrowa olavuliwa vooanara,” aahimye ti pro—profeta wa Maria. Enrowa okhala ethoonyeryo, veekhai, enookhala. Masi onrowa okhala nrromelo. Onrowa okhala mphento. Onrowa okhala etteeliwo murima. Enrowa okhala etthu munsuwel’anyu wira moovira mookhwaani khuphwanya Ekumi.

¹⁶³ Munn’aka, murokor’aka; ntoko munn’inyu, ntoko murumeyi anyu mwa Kristu, mukihye kookupaliheni, ni murim’aka wothene. Muhihye ela yoovirakani vasulu, wala epantte emosa, wala vathi. Mwaakhele Eyo mmurimani mwanyu, nto munookhala mutthu oohakalala mulaponi.

Nkinoororomelihani wira munoophwanya itoolare emilyawu. Nnari, mulopwana. Munna Leo, kinoona wira khasireere sinci-ene sooromelihiwa seiyo vano, “itoolare imilyawu,” itthu soovirikana anci-ene ahimaly’aya. “Mwakhalaru muKristu, munookhalana itoolare emilyawu ene ni munookhala mutthu thaaciri.” Miyo nkinoororomelihani etthu.

Miyo kinoororomelihani ila, etthu emosa paahi kikhanly’aya woororomelihani: woopola Wawe. Mahala Awe t’ophiyerya khula muxankiho. Atthu oPentekositeni, awo khayaatthuna hata etthu yaarin’aya. Vano olavulaka mwaha w’anamilyawu? Awo khayaatthunasa etthu yaarin’aya, Munna Angie.

¹⁶⁴ Kaanithuna kiwiweni nyuwo ni Gertie mwiiipaka, nihiku nlo, (Ori vayi yoowo?), *Esumana Yohokolowela Owaani*, nihiku nlo. Anci-ene aya aavira mmukaanoni okhuma vaavo. Oh, wulu!

Awo khayaavekelasa itthu suulupale. Awo khayaavekelasa musurukhu. Vano, Petru irale, “Eparatha ni eweero nkirina, masi yeeyo erin’aka, miyo kinimoovahani.”

Nto miyo kinihimya yeeyo ohiy’ula, apatthani. Ohakalala, ophenta, nrromelo, kirin’aka sa Kristu ni ohihimuwa Wawe, seiyo kirin’aka, miyo kinimoovahani; Kinnoovahani, ntoko aana a Muluku.

Vano nyuwo murwe mukhale vamwiikimanyo vakhala wira Muluku oowiihanani, nto muhivenye. Mwarwa vale meelo ohiyu, mukele mu mukhale mpakha omala, wala nwele va nto ninrowa ovekela ni owiixaatheryani matata. Murowe. . . Iwo ti oruma wa Bibilia, mwawiixaatherye matata awo wira yaakhele Eroho Yowarya. Vano ninrowa, munoorowa owannyu. . . Mwakhala vaavo, mwakhala ohiyu wothene, khukhala nihiku noottharelana, khukhala nihiku noottharelana, khukhala mahiku a wiitthyuuwa, khukhala mpakha nihiku noopacerya na mwaakha, nto mukhalaka, mukhale mpakha.

¹⁶⁵ Eyo, etthu p’itthu eniixuttih’ahu ya meelo ohiyu, niwoonihakani mBibiliani etthu entthuna orwa, enimoorwa. Nto Eyo yarwa, nto khaavo axetwani oophiyerya moohaaxani. . . Moosuwela wira moovira mookhwaani khuphwanya Ekumi. Nyuwo mwa yoopattuxiwa esya mwa Kristu Yesu. Isiinu s’ohakalaliha sa Wirimu sinooruma.

¹⁶⁶ Munna Othal, kinimooleelani, eyo enoovarelihani mooro paahi. Va ookhala mmiravo mmosa okilante va, munn'aka mmosa a khalayi, aari namatuphela aakuxaka ikapwitthi muyuununi, amphavelaka mutthu munlothoni, mutthu wira amphutule muru awe. Nto exeeni yiraneieye? Nihiku nimosa owo khuweha khwaamini mwaha w'Ekumi. Vano owo khweetta arowaka. Owo khutthara mithukumano saka. Vano mmirav'owo, oohaawa ahirina etthu y'olya, khumpaathi khurupa mutakhwani mukerekhere w'eheema, avoliwaka etala ni ntthona. Nto nihiku nimosa Eroho Yowarya khurwa. Oh, munn'aka, eyo khumurukunxa, kahi siiso? Eyo yaahiruua Ekumi, nto khukumihaha okhwa. Onyokha khurwa, vano mphento khukela. Oh, wulu! Owanani ni ekhotto sothene khumalamala; Ekumi esya khukela.

Nkawehani va akina vaara vakina ni akina, vaara vakina ni vakina, ni iwo. Oh, esiinu ya ohakalala ya Wirimu enooruma! Apatthani, khiivo enamuna ya miyo ohimya eyo.

¹⁶⁷ Nwiriyaane, wira kihie ela, vakhala wira muhaamini onamoonaha aka, ntoko murumeyi a Kristu, ni wira koophavela owoonihani ni Bibilia a Muluku wira ekeekhaii. Ni masu aka yaakhalaka ntoko pooti okhala ootikiniha vakhani wa yeela, nwehe elatarato ele molumwenkuni mwa siyensiya. Nwehe sookhumela, wira Nlumi nla na Mooro naaweetihale Aana a Isarayeli, nwehe sookhumela Nlo nnikumihery'aya. Moone etthu Nlo nniir'aya, etthu Nlo nnihimy'aya.

Nkihiyo miyo kinlavula; ti Yoowo onlavula mwa nyuwo, moone. Nkihiyo miyo kinoona soowoona; ti Yoowo onlavula mwa nyuwo. Nkihiyo miyo kinaavoniha aretta; ti Yoowo ori mwa nyuwo, onaavoniha aretta. Nkihiyo miyo kinlaleya; miyo ka namoova namahala ottuli, aatthyawa muupuwelo ene yoowo, masi ti Yoowo onlavula memmo. Miyo nkinsuwela Masu; masi Owo onnisuwela Yaawo. Ti yeeyo. Ti yeeyo. Ti yeeyo ekhanle.

Nto Owo ori vo. Nto Nlaikha nenle nimosaru na Muluku niri va mpaani mu ohiy'ula. [Munna Branham ommana vapulpitu—Mol.] Oh, moota onimphent'aka Yoowo!

¹⁶⁸ Vano akavi antthuna waakhela Eroho Yowarya? Mutthokelele makhalelo anyu. Akavi ahaakhenle Yeeyo, nave antthuna waakhela? Nvenxe ntata, mwiire, “Munna Branham, mowiixani mwa mmurimani mwaka, kintthuna kaakhele Eroho Yowarya.” Muluku ooreeriheni nyuwo, mapuro othene.

¹⁶⁹ Akavi a nyuwo yaakhenle Yeeyo, ni yaatthuna orowa ntoko awo yirans'aya mwa Miteko 4, ni wira, “O Pwiya, O Pwiya, mookole ntata Nanyu nvonihaha, ni mooniheryaka ithoonyeryo ni mitikiniho mu Nsina na Mwan'Inyu oowaarya Yesu, ni okivaha ominyala ni mphento, wo olavula, ni osarihiwa vasya”? Ayo, nla va nawaka, nave. Muluku, mukivahe Yeeyo miyo.

Nrowe nuurame muru ahu, moowiixeryani w'exariya, khula mutthu avarelaka entthun'awe mmurimani mwanyu.

¹⁷⁰ Pwiya Yesu, hiyo ninnimaliha muthukuman'ola mwaamukhaani ohiy'ula, numala opathhana mwa Masu ni Eroho Yowarya. Moota Owo onireerinh'awe ni omwaraxenly'awe mmurimani mwahu makhura a Masu Awe! Aakhala arumeyi, aakhala alopwana va iphiro sothene s'ekumi, alawihale ni yoonale wira Apwiya t'oreera murima. Hiyo noosuwela ele ekhanle Eroho Yowarya vano, natiri a Muluku. Ti Ekumi Ehinimala wa othene ale anaamini.

¹⁷¹ Ni noosuwela wira Eroho Yowarya yaari Eroho ya Yesu Kristu eveleelihiwe-tho, ni Eyo eri mwa hiyo olelo. Ntoko Muluku saary'awe vasulu vahu, mwa Nlumi nle na Mooro; vano Owo aaheetta ni hiyo, mu...erutthu yaihaniwa *Emanuweli*, "Muluku ni hiyo"; nto vano Owo ori mwa hiyo, mwa Eroho Yowarya, Muluku mwa hiyo. Oh!

Yesu oohimya, "Nihiku nenlo munoosuwela wira Miyo kiri mw'Atithi, ni nyuwo muri mwa Miyo, ni Miyo kiri mwa nyuwo. Munoosuwela saana nihiku nenlo. Okhala wira, nyuwo muri molumwenkuni mw'epiphi, ntoko wira, vano, masi nihiku nenlo nyuwo munoosuwela saana."

¹⁷² Tithi, khivaaweryaneya ohipakiwa oratteene ni voolikana, okhala wira nto khanaarowa okhalana etthu yookhalanela waamini. Masi miteko sothene sa Muluku sineettihiwa ni waamini. Ni mwaha wo waamini Masu Anyu, mwa wooniherya wa Eroho Yowarya ninsuwel'ahu wira t'ekhanle vano, kinvekela wira khula munepa ovoliwe etala mu osarihiwe Eroho Yowarya. Ale ahirina Yeeyo, ni anvoliwa etala mwaha wa Yeeyo, yuupuwele paahi...Hiyo nnimwaaleela awo, Pwiya, ntoko ela Nyuwo muhimaly'anyu, "Ooreeriwa ti nyuwo mwaavoliwaka etala ni ntthona. Munoorowa ovona." Owo natirii. Nave nto onkhala oreeriwa ovoliwa. Nyuwo munooreeriwa hata osuwela wira Muluku olavula ni nyuwo, maana Eyo ehimmye wira, "Khaavo onwerya orwa wa Miyo ehikhanle wira Atithi Aka anoomuruuha toko."

¹⁷³ Nto, Pwiya, ale ari aalweene a khalayi va, awo aavenxa matat'aya. Miyo koovenxa nawaka. O Pwiya, munivahe ikuru, munivahe Owerya wira nookole ntata na Mwan'Inyu oowaarya Yesu, wira ithooneryo ni mitikiniho siiriwe, wira okhale muteko wo wiixeryaxa, etthu yuulupalex aehitonko okhumelela nlelo. Munivahe ominyala ni ophenta, wira nilavuleke n'atthu. Munivahe, Pwiya. Mukhale ni hiyo mwa itthu sothene, hiyo ninvekela mwa Nsina na Yesu.

¹⁷⁴ Nto meelo ohiyu, Pwiya, erwe ettheeku enoopa n'ikuru, emorele mpaani mu, enrowa okhala ntoko Nihiku nikina na Pentekosite. Mulipiheryo wooheliliwa. Itthu sothene soolikana. Inyompe sihiwiwa, inama soonenevihiwa sihiwiwa,

amwaapwittipwitthi ahiiviwa; meesa aathhokihiwa, alipa-oolattuliwa aalattuliwa. O Pwiya, munveleelihe yopeeli a Pentekosite, meelo ohiyu, mpaani mu, ni osarihe khula munepa ni opatiiso wa Eroho Yowarya. Munivahe, Tithi. Hiyo ninvekela mwa Nsina na Yesu. Amen.

. . . ninimwiixutta itthu sinci-ene,
Ninoorowa okhalana eliivuru ya masipo
yoopakiwa ni eweero, khino ya mikhoyi
ekonto emosa;

Ninoorowa wiipa ni onyakula ni wiina,
Mwapwiitipwitthi onookukuttha maithori
ahu;

Ninrowa okhala etthoko- . . . esumana
yuulupale y'ohokolowela owaani, iyaakha
ekonto emosa soopacerya. Amen!

Ephome yoorikaxa ya Mwaana a Muluku
Mwaneene yoorapiha ni yooreeriha
Atthu ooreerexa mwaha wa Nsina Nawe
aniihaniwa Mwaakameliwa.

Anamwi nno ehicaliwaka ni ethanyiwaka,
nihiku nlo Apwiya animwaaruuha

Ale oothanliwa vamukhora vaavo, ni owo orina
maana- . . .



Eroho Yowarya Evaheriwe Exeenii? EMK59-1217
(What Was The Holy Ghost Given For?)

ETTHARANELO YA MITTHAKA SA EROHO YOWARYA

Mutthak'ola wa Munna William Marrion Branham, opaceryawene olaleeriwe ni Enkelesi Namaxexe ohiyu, mahiku yeettaka 17 mweeri wa Dezembro, 1959, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2021 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org